

## Etu

### *Uru, nọ l'etu*

<sup>1</sup> Etu, ọ nmashiru; mbu Sólomonu Dévidi, bu eze ndu Ízurelu. Iphe meru iphe o gude nmashia etu ono bu:

<sup>2</sup> k'ophu madzụ e-gude iya  
maru iphe; shi iya duje ike  
lọ-gude onwiya;  
k'ophu okfu, dụ ogvu  
e-doje iya ọnya;

<sup>3</sup> mẹ k'ophu madzụ e-nweru  
egomunggo;  
zije obu l'alị eme iphe;  
bụru onye doberu ẹka ndoo;  
l'eme iphe vudo nhamunha;

<sup>4</sup> k'ophu ndu ẹ-te nwedu  
egomunggo e-nwe iya;  
unwu-okoro bya akwaa ọnya;  
ọnya erua ẹphe alị.

<sup>5</sup> Tẹ ndu maru iphe  
ngabẹ nchị mụtafua  
iphe yekwaru l'ophu ẹphe mahawaru;  
ndu elerutaje ọnya l'iphe akabaa ya elereta;

<sup>6</sup> k'ophu ẹtu; akali-okfu;  
okfu ndu nweru mmamiphe;  
mẹ l'ilu e-doje ẹphe ọnya.

<sup>7</sup> Ọ kwa ọtsu Ojejoje egvu  
bụ ẹke mmamiphe dụberu.  
Obenu lẹ ndu eswe ta dudu

iphe ephe agubeje mmamiphe;  
tò dù iphe ephe guberu àhùhù.

*Okwa, aanmaru*

*unwu-okorobyà*

- <sup>8</sup> Nwa mu; ngabejekwa nchì  
teke nna ngu akpọ-ziru ngu ụzo;  
ophu ijikajekwa iphe nne ngu ezi ngu;
- <sup>9</sup> kẹ l'okfu ephe ono a-buru okpu;  
mee ishi ngu t'ọ dù ugvu;  
bukwaruphu iyagba-olu,  
e-mee ngu; nggu aburu ẹgiri.
- <sup>10</sup> Nwa mu; teke ndu eme  
ejo iphe eme t'ephe deta  
ngu; be ekwekwa.
- <sup>11</sup> Ephe -sụ ngu t'ì bya etsoru  
ephe; t'unu je ekee l'ụzo; gbua madzụ;  
mbụ t'unu je akwabẹru ndu  
ẹ-ta dudu iphe ephe meru l'ụzo;
- <sup>12</sup> t'unu lee ephe ẹ ndzụ ẹge ili, eleje odzu;  
mbụ lee ephe wọ l'ọ bụ  
ndu wulahuru l'iduma;
- <sup>13</sup> ephe -sụ ngu l'unu e-gwo  
igweligwe iphe, vu oke aswa;  
gude iphe unu kwaru  
l'okwata dojia ụlo unu;
- <sup>14</sup> ephe -sụ ngu: "T'ì turu ẹka  
yeru ephe; ẹge nggu l'ephe  
a-gbaru mgba l'okpoga ephe nataru;"
- <sup>15</sup> nwa mu; be tsokwa ephe!  
Be yekwa okpa l'ụzo, ephe esh;
- <sup>16</sup> kẹ l'ọ kwa ome ejo iphe;  
bẹ ephe anọduje agba perepere iya;

to nwe iphe ephe guberu ogbu madzu.

17 L'agwo madzu, phuru l'enya ta atajekwa iya.

18 Ndu-wa kwa onwephe;  
be ephe kwaberu t'ephe gbu;  
o kwa onwephe be ephe  
kwaru l'uzo ege ono.

19 O kwa ege ono; be o-duru  
ndu gude enya-oku l'achọ uru.  
Uru, e ritaru ege ono  
egbukwa onye ritaru iya nu.

*Onye 'ama iphe yee iphe emee*

20 Mmamiphe tsoru  
mgbadamgba l'echi mkpu.  
O no l'echi edukfu l'echi mkpu.

21 Oovudo l'ishi uzo l'echi mkpu;  
nodu l'obu-edukfu mkpukpu l'araru  
iya ndu oha arara; su:

22 “?Bu teke ole; be unube ndu  
e-te nwedu egomunggo  
a-ha ome eswe?  
?Bu teke ole; be ochi ndu odo ochi  
a-tso-buhu ndu achị iya nu ena;  
mmamiphe adu-buhu ndu eme eswe ashị.

23 Unu ngabe nchi le mba,  
mu abaru unu; k'ophu mu  
e-koshi unu uche mu;  
mee t'unu maru iphe no mu l'obu.

24 Obenu le keshinu mu kuru  
unu oku;  
unu ajika azaza;  
to nwe unu onye yeru mu onu  
teke mu machiru unu eka;

25 wota iphe mu akpo-ziru unu baa l'ali;

- unu te kwe ọnata mba, mu abaru unu;  
 26 be mu e-mekochakwaa chia  
 unu ọchi teke ụmuruku  
 a-muru unu.  
 Mu a-ja unu ewena teke  
 unu a-ọdu eje ntakfuru;
- 27 mbụ teke oke ndakfu a-pata unu  
 l'ọ bụ oke pherephere;  
 mbụ teke ọtu-gbirimu  
 nmaḍeru unu swọkoswoko l'ọ bụ ọku-maa;  
 mbụ teke ono, ụtsuruku  
 a-tsu unu ono.
- 28 Teke ono; be unu e-ku mu; mu ta aza unu.  
 Unu e-le ọnya mu; unu ta aphụ mu.
- 29 Le keshinu ọphu mmamiphe dụ ẹphe ashị;  
 ẹphe ta hata ọtsu Ojejoje egvu;
- 30 keshinu ẹphe te ekwedu te  
 mu kpọ-ziaru ẹphe ụzo;  
 woru mba, mu abaru ẹphe wụa l'alị;
- 31 be ẹphe e-mekochakwaa ria  
 uru ẹjo ụzo, ẹphe etso; rijia ya ẹpho;
- 32 ke l'ọ bụ ụzo, ndu ẹ-te  
 nwedu egomunggo  
 shisweru;  
 bụ iya e-gbu ẹphe.  
 Yọ bụru ọnya ndu eme eswe,  
 jiru onwẹphe e-me;  
 ẹphe aburu ndu ọ-la-l'iyi.
- 33 Obenu l'onye ngaberu  
 yẹbe mmamiphe nchị;  
 ta dudu iphe eme iya nụ.  
 Ehu a-dụ iya agu;  
 ọphu ọ byadu bya atsu egvu iphe-ehuka.”

## 2

### *Uru, nọ lẹ Mmamiphe*

- 1 Nwa mu; haa okfu,  
shi mu l'ọnu;  
mẹ iphe mu ezi ngu ezizi;  
t'ọ gaaru ngu mkpa.
- 2 Wota nchị ngu pyoo l'ẹke mmamiphe nọ;  
nggu ewota obu ngu zia l'ọmuta iphe.
- 3 Rojee rọ-shia ike;  
tẹ iphe doo ngu ẹnya;  
obu erua ngu alị.
- 4 Lee ẹnya iya l'ọ bu  
onye ele ẹnya mkpọla-ọcha;  
nggu achọ ya l'ọ bu  
onye achọ ẹku, e domiru edomi.
- 5 Ono bu teke iphe bu  
ọtsu Ojejoje egvu  
e-do ngu ẹnya;  
nggu amakwaruphu Nchileke.
- 6 Kẹ l'ọ bu Ojejoje anuje mmamiphe;  
buru iya emeje t'iphe doo  
madzụ ẹnya; onye ọbu akwaa ẹnya.
- 7 Ndu obu guru iphoro;  
b'ọ kwakoberu mmamiphe;  
l'egbochitaje ndu  
uta ẹ-ta dudu lẹ ndzụ ẹphe.
- 8 Ndu doberu ẹka ndoo;  
bẹ ọonoduje echekwa;  
ọphu oowofujedu ẹnya  
l'ẹke ndu o gude ire ẹphe ẹka.
- 9 Ọ bu mmamiphe e-me t'ị  
maru iphe bu odobe ẹka ndoo;

- maru iphe bu ikpe, du maa;  
 maru iphe bu ire-lanu;  
 me uzo, du mma.
- 10 Ishi iya aburu le mmamiphe  
 a-ba ngu l'obu;  
 l'iphe odo madzu enya  
 atsolahaa ngu ena.
- 11 Okfu, vudo nhamunha;  
 me iphe-odo-enya aburu  
 iya a-nodu eche ngu ehu.
- 12 Mmamiphe bu iya a-dzo  
 ngu l'okpa ndu ejo iya ono;  
 dzoo ngu l'okpa ndu ntumatu.
- 13 Mbụ ndu ahaje uzo,  
 vudo nhamunha;  
 shilahaa uzo, gbaru ochi;
- 14 ndu, bu ejo iphe aduje ephe mma;  
 ugho aburu ephe iphe otso ena.
- 15 Ephebedua l'onwephe  
 bu ndu eregede.  
 Iphemiphe obule,  
 ephe eme aburu eregede.
- 16 O bu mmamiphe a-dzo  
 ngu l'eka nwanyi, eri ogori;  
 mbu l'eka nwanyi, pheru akoru;  
 bya egude ire meremere l'edeta madzu.
- 17 Mbụ nwanyi, gbafutaru le ke nwoke,  
 kuru iya akuku; wowaru ndzu;  
 ephe gbaru l'ifu Nchileke fua l'ali.
- 18 Ulo egbe nwanyi ono kwa alufu-anwuhu;  
 uzo iya aburu uzo, e shi ala maa.
- 19 E to nwedu onye kparu l'ulo  
 nwanyi ono, latajeru nu.

- To nwe onye jejeru iya nū,  
phuru okpa, o gude lata.
- 20 Oo ya bu; t'i tsoru okpa ndu eme ohuma.  
T'o buru uto ndu, doberu  
eka ndoo etso; be ii-nodu etso.
- 21 Ke l'o kwa ndu obu guru iphoro e-bu l'ali-a;  
buru ndu uta e-ta dudu le  
ndzu ephe e-bu iya.
- 22 Obenu le ndu ejo iya ono;  
be ee-me t'ephe chihu l'ali-a;  
fefu ndu, e te gudedu ire ephe eka efefu.

### 3

#### *Idzu, aachi-koshi unwu-okorobya*

- 1 Nwa mu; ba azahakwa  
iphe mu ezi ngu.  
Wotakwa iphe ono,  
mu ezi ngu ono ye l'obu;
- 2 ke l'o kwa iya e-me t'i kaa nka;  
mekwaaphu t'ehu du ngu agu.
- 3 Be ekwekwa te n-yemobu  
yete ire-lanu nahu ngu.  
Tu-kpua ya l'olu l'o bu iphe-olu;  
nggu edee ya edede l'obu ngu;
- 4 k'ophu ii-tuba Nchileke l'obu;  
tuba madzu l'obu;  
epha oma aburu nke ngu.
- 5 Gude obu ngu l'o ha dakobe Ojejoje;  
Ba achikwaru ukfu kwee  
le mmamiphe k'eka ngu.
- 6 Te Ojejoje vutajekwaru ngu  
uzo l'iphe bu iphe iime ememe;  
ke l'oo-me uzo ngu t'o kfulu gbororo.

- 7 Ba abụkwa nwa  
     ọ-maru-omachata.  
     Tsu-jechia Ojejoje egvu;  
     nggu aghaaru ejo iphe azu.
- 8 Ono bu iphe e-me t'ehu  
     duje ngu npho;  
     mekwaaphu te okpu shihu ngu ike.
- 9 Gude eku ngu kwabe Ojejoje ugvu.  
     Nnggu egude iphe odungu,  
     i kpataru l'iphe i meberu l'alị;  
     kwabe iya ugvu.
- 10 Teke ono; oba ngu eji ejiji;  
     me e ophungu eji mbenu ngu.
- 11 Nwa mu; ba agwokwa  
     ahuhù, Ojejoje ahù ngu le ntụ;  
     ophu ike 'agwukwa ngu le mba, o baru ngu;
- 12 ke l'ọ kwa ndu Ojejoje yeru obu;  
     be obajeru mba;  
     ege ono, nna abajeru  
     nwatibe iya ophu o yeru obu ono.
- 13 Onu-oma kwa k'onye choru  
     mmamiphe; cho-vu iya;  
     mbu onye iphe edoje enya.
- 14 Ishi iya aburu le mmamiphe  
     kakwa mkpola-ocha.  
     O kwaphu ege ono;  
     be uru, no le mmamiphe  
     ka ke mkpola-ododo.
- 15 O ka mkpuma, vu oke aswa ire.  
     E to nwekwa iphe agu ngu enweru,  
     nweru ophu ka mmamiphe.
- 16 Iphe no iya l'eka-utara  
     bu nka;



- ọphu nọ iya l'ẹka-ibyita aburu  
 ẹku; mẹ ùgvù.
- 17 Iphe nọ l'uzo iya bu  
 ẹhu-otso-ena;  
 buru ẹhu-agu jiru esu-uzo iya.
- 18 Ndu rukuru iya ẹka;  
 bẹ ndzụ edzuje;  
 ndu gbakuru iya nọ aburu ndu a goru onu.
- 19 O bu mmamiphe;  
 bẹ Ojejoje gude tọ  
 ntọ-l'alị mgboko;  
 gude iphe-odo-ẹnya mee igwe.
- 20 O bu mmamiphe iya;  
 b'o gude mee tẹ mini  
 ẹnyimu wata atsotso;  
 mẹ tẹ iyi, shi l'urukpu ghọ  
 mini; wata achichi.
- 21 Nwa mu; gudesikwaa ọkpobe  
 mmamiphe ike;  
 nggu amakwaruphu ẹge  
 ii-shije l'eye onu l'okfu.  
 Be ekwekwa t'ọ nahụ ngu.
- 22 O bu iya a-buru ngu ndzụ;  
 buru ákà, ịi-nya l'olu gude  
 l'emema onwongu;
- 23 k'ọphu ụzo ngu a-buru ngu chiri-ị-lerere;  
 ụkfu ta adu ngu; nji ta aji ngu.
- 24 Teke ịize azẹ; ịi tsudu egvu;  
 mgbenya ngu aburu l'ẹhu-gudangu.
- 25 E ịi tsudu egvu iphe-kpaa;  
 ịi tsu egvu teke ndu ejo iya  
 ono e-kpolashihu;
- 26 ke l'ọ Ojejoje a-buru mgbaru-ike ngu;

- b̄uru iya a-n̄odu edu ngu  
 t'ẹ b'ị nma l'onȳa.
- 27 Ba anafujekwa madz̄u  
 iphe d̄u mma, gbaru iya n̄u;  
 m'ọ -b̄uru l'ọo nggu b'ọ n̄o l'ẹka ememe.
- 28 Ba asujekwa madz̄u ibe ngu  
 t'ọ bya echile bya iya anata;  
 l'ẹke iphe ọbu n̄okwa ngu-a l'ẹka teke ono.
- 29 Ba achijekwa idzu iphe  
 a-ts̄uru ibe ngu;  
 mb̄u onye nggu l'iya t̄saru onwunu ẹhu.
- 30 Be ekobejekwa madz̄u okfu ìphòró;  
 l'ẹbe ad̄u iphe o meru.
- 31 Be ekojekwaru onye eme  
 iphe-kpaa okopho;  
 ọphu i yekwa ọkpa l'ẹke  
 o yeru;
- 32 kẹ l'onye eme  
 m̄kpako-m̄kpako  
 adujekwa Ojejoje ash̄i.  
 Obenu l'onye obu guru iphoro;  
 bẹ Ojejoje atujeru obu yeru.
- 33 Ụlo ndu akirishi;  
 bẹ Ojejoje t̄akwaru ọnu.  
 Obenu l'ufu ndu doberu ẹka ndoo;  
 bẹ ọgojeru ọnu.
- 34 Ndu aja ndu ọdo ewena;  
 bẹ Ojejoje ajalatajekwa.  
 Obenu lẹ ndu d̄u agu;  
 b'o mejeru eze-iphe-oma.\*
- 35 Ndu maru iphe b'a kwabeje ugvu;

---

\* 3:34 3:34 Jém 4:6; 1 Pyit 5:5.

obenu l'ọo iphere abujeru kẹ ndu eeswe.

## 4

### *Mmamiphe ka*

- 1 Ụnwu mu; unu ngaberu mu  
nchị l'ọ bu nna.  
Unu kpaa iphe lẹ nchị;  
k'ophu unu e-shi iya mụta iphe.
- 2 Iphe mu ezi unu kwa ọkpobe iphe.  
Unu ba agbakwa iya mgbukuma.
- 3 Teke mu shi buru  
nwokorọbya; buru lẹ kẹ nna mu;  
mbụ teke mu bukwa dua nwata;  
buru nne mu nwa lanu;
- 4 bẹ nna mu ziru mu iphe; sụ:  
“Tẹ mu kweshikwaa ẹka ike l'okfu iya.  
Mu emeje iphe o kfu;  
k'ophu ndzụ e-dzu mu.
- 5 Tẹ mu nwekwaru mmamiphe;  
iphe edojee mu ẹnya.  
Tẹ mu ba azahakwa okfu iya;  
ophu mu 'ewokwaru okfu iya dobe l'aguga.
- 6 Tẹ mu ba ahakwa mmamiphe;  
kẹ l'oo-leta mu ẹnya.  
Tẹ mu yeru iya obu  
ẹge ọo-nọdu eche mu nche.
- 7 Ọ bu mmamiphe ka.  
Ọo ya bu t'ị chọ mmamiphe;  
nggu achọ egomunggo;  
m'o -ruhuru oo-phu ngu ngunu.
- 8 Kutsee ya; ọo-pali ngu eli.  
Nmaa ya akpa; ọo-kwabẹ ngu ugu!

- 9 Oo-kpube ngu okpu, e-me t'ị dụ ugvu;  
mbụ kpube ngu okpu-eze, ama mma.”
- 10 Ngabekwa nchị; nwa mu;  
t'iphe mu ekfuru ngu-a  
ga ngu ọnu nchị;  
k'ophu ịi-ka nka.
- 11 O kwa ụzo mmamiphe;  
be mu ezi ngu;  
buru ụzo, vudo nhamunha;  
be mu edu ngu eshi-a;
- 12 k'ophu bu; teke ịi-nodu eje;  
t'e b'ọ dụ iphe anọ-chi ngu ụzo.  
O -buru oso be ịigba;  
te be ukfu ba adu ngu.
- 13 Gudeshia okfu ono ẹka ike;  
be ekwekwa t'ọ nahu ngu;  
lepyabe iya ọnya;  
ke l'ọ kwa iya bu ndzu ngu.
- 14 Be ejekwa oye okpa l'uzo ndu akirishi;  
ophu i shikwa ụzo ndu ejo iya ono.
- 15 Bujekwaru ụba yeru iya;  
be ejejekwa iya eshishi le phuu;  
gbangojekwaa ya;  
shia ụzo ọdo; je iphe iije.
- 16 Ndu ejo iya ono te  
ekujekwa mgbenya;  
l'ephe ẹ-be eme iphe ephe tumberu.  
Ophu ephe 'edobedu ishi-mgbenya;  
a gufu l'ephe meru t'ukfu kpọ madzu.
- 17 Nri ephe bu akirishi;  
mee, ephe anguje aburu ome iphe-kpaa.
- 18 Uzo, ndu doberu ẹka ndoo  
aduje l'ọ bu iphoru

- nchi-aboḥu, anoḍuje asa  
petengu jeye yo boḥu-ghee.
- 19 Obenu l'uzo ndu akirishi  
agbaje tsubalangu;  
k'ophu bu l'ephe ta  
amajedu eke ukfu a-du ephe.
- 20 Nwa mu; ngabekwa nchi  
l'iphe-a, mu ekfuru ngu-a.  
Gebekwa nchi ohuma l'okfu mu-a.
- 21 Be ekwekwa t'enya ngu lufu iya.  
T'o noḍukwa ngu l'obu;
- 22 ke le ndu nuru okfu ono  
e-gude iya noḍu ndzu;  
ehu-npho aburu nk'ephe.
- 23 T'obu rukwaa ngu ali l'oriri;  
ke l'o bu iya bu eke ndzu shi.
- 24 Be ekwekwa t'o nweru okfu,  
gberu nggo, e-shi ngu l'onu.  
T'iphe e-ta budu ire-lanu;  
be eshikwa ngu l'onu.
- 25 Tube enya ngu l'uzo ifu;  
ba ahakwa eke i chiberu ifu;  
wata oghada aghada.
- 26 Gbujeodu igo l'uzo,  
i shi temanu nggu eyedu iya okpa;  
k'ophu okpa te echifudu ngu.
- 27 Ba ahakwa okpobe uzo;  
swia ya l'eka-utara;  
m'o -bu l'eka-ibyita;  
sefutakwa okpa l'ejo iphe.

## 5

*Onma okwa ori ogori*

- 1 Nwa mu; gebe nchị lẹ mmamiphe mu;  
 nggu eworu nchị dobe  
 l'okfu, gbaru akpị,  
 mu ekfu anụ ngu;
- 2 k'ophu ii-majeru oye onu l'okfu.  
 Okfu, shi ngu l'onu ekoshi l'ị maru iphe;
- 3 kẹ l'okfu, shi nwanyi,  
 eri ogori onu aduje l'ọ bu manụ-engu;  
 l'akwo teriteri l'ọ bu manụ urationu.
- 4 Obenu l'ikperazu iya;  
 b'ọ tsoje age;  
 buru ogu-mbeke, atsụ nkọ ifu labu.
- 5 Onye, tsoru iya nụ laakwaru;  
 anwuhu aburu ishi iya.
- 6 E tọ kpajedu ishi iphe e-me tẹ ndzụ dzua.  
 Ndzụ iya agbakọtaje  
 nggirikonggirigo;  
 ọ bu l'ẹ t'ọ majedu.
- 7 Nwa mu; mejekwa iphe mu ekfu.  
 Ba ahakwa iphe mu ekfuru ngu;  
 wata ome iphe ọdo.
- 8 Bujekwaru ụba yeru egbe nwanyi ono.  
 Be ejenyabejekwa onu-ulo iya ntse;
- 9 a nonyaa; i woru ugvu,  
 gbaru ngu nụ; nụ ndu ọdo;  
 woru ndzụ ngu tūaru onye  
 imiko madzụ ta adujedu.
- 10 Teke ono;  
 ndu o-shi-awe o-shi-awe  
 abya aphụpyabe ngu;  
 akanya, i seru aburu ndu ọdo e-ri iya.
- 11 L'ikperazu; ndzụ ngu aburu ude kpūu.  
 I -kahulephu; ụvo ta nọhe ngu.

- 12 Teke ono bẹ ii-sụ: “Nanụ  
 ẹge ọ dụ; b'ọ shi abuje;  
 a -lọ mu ẹka lẹ nchị;  
 mu ta agube iya iphe.  
 A -baru mu mba;  
 yo ghu mu eghughu?
- 13 Mu jikaru ome iphe ndu ezi mu iphe kfuru;  
 woru nchị mu swọ-chia l'ẹke ẹphe nọ.
- 14 Nta-a bẹ mu eyifuwa  
 eyifuwa l'edzudzu ọha.”
- 15 Wofu ẹnya lẹ nwanyi onye ọdo.  
 Tẹ nwanyi, ị kuru àkuku  
 dukwa ngu l'ọ bụ wẹlu,  
 ị turu l'onwongu.
- 16 ?Nanụ ẹge ii-shi woru  
 onwongu haaru unwanyi esu-uzo;  
 wota iphe shi ngu l'ẹhu  
 ghaa l'edukfu ọha?
- 17 Wota onwongu doberu  
 nyee nke ngu nkinyi iya;  
 tẹ yẹle ndu ọdo ba agbakwa ngu mgba.
- 18 Tẹ nyee ngu bukwaru  
 ọnu-ọma.  
 Tẹ nwamgboko, i gude  
 kpoo ekfu bukwaru ngu ẹhu-otso-ena.
- 19 T'ọ dujekwa ngu l'ọ bụ  
 ada ele l'obu, i yeru iya;  
 dụ ngu  
 l'ọ bụ umoro-enyimu lẹ mma.  
 Tẹ ẹra iya mejekwa t'ẹhu  
 tsọ ngu ẹna; obu, o yeru  
 ngu atsujekwa ngu atsutsu.
- 20 Nwa mu; ?nanụ ẹge ọ dụ

- b'ò bụ nwanyi onye ọdo,  
 a-nọdu agba ngu igiri;  
 kẹ tẹ nggu l'iya je  
 anmakube onwunu?
- 21 Kẹ l'iphe, madzụ eme;  
 bẹ Ojejoje chi l'ẹka;  
 l'enyocho l'iphemiphe  
 ọbule, madzụ eme ememe.
- 22 Iphe ẹjo madzụ eme;  
 bẹ ahataje iya l'ọ bụ ọnya;  
 bụru ụgbu kepyia ya.
- 23 Iphe e-gbu iya nụ aburu  
 àhùhù, ẹ ta ahùdu iya.  
 Yọ bụru ririri ono, oome ono;  
 bụ iphe e-me iya;  
 yo phuhu.

## 6

### *Okwa, aanmaru onye eswe*

- 1 Nwa mu; ọ -bụru l'ị naru  
 madzụ ibe ngu mkpalẹka;  
 wowaru onwongu yeru  
 madzụ l'itumo l'ụgwo,  
 onye ọdo ji iya;
- 2 ọ -bụru l'iphe ono,  
 i kfuru ono bụwa ọnya;  
 hata ngu;  
 okfu ono, shi ngu ọnu ono  
 aburu ụgbu kota ngu;
- 3 ọwaa iphe ii-me; nwa mu;  
 gude gbata onwongu;  
 keshinu ị dalahụwaru obutobu ngu l'ẹka:  
 Jelekwapu je agwotohuru iya;



- rọọ ya jeye teke ii-rọ-butu iya.  
 4 Be ekukwa mgbenya;  
   ọphu i kwekwa tẹ mgbenya roru ngu;  
 5 l'ẹ ba bu l'i dzofuru onwongu  
   l'ọ bu mgbada nyikufuru onye achi nta l'eka.  
   Mbụ l'ọ bu nwenu, nmaru l'etse;  
   nọ nyaa; shi iya nahu.  
 6 Jeduduphu ẹke unwehu nọ;  
   nggube onye enyiru!  
   Gbua igo l'iphe ephe eme;  
   gude iya maru iphe.  
 7 Unwehu te nwe du onye ishi;  
   to nwe onye eleta iya nu; l'ẹke ọno eje ozi;  
   te nwe onye achi iya nu.  
 8 Obenu l'ọbuje; o -rua  
   l'onanwu; yọ kpa nri dobe.  
 9 ?Bu teke ole; be ii-ze ege ono  
   ze-bebe; nggube onye enyiru?  
   ?Bu teke ole be ii-tehu le mgbenya?  
 10 Iisuje l'ọ kwa t'i kua  
   mgbenya nwanshi;  
   mbu-a t'i dobe nwishi l'oshi; tuta ume;  
 11 jeye teke ejeka a-bya azu  
   ngu gbirimu l'ọ bu ndu ana nfu;  
   ukpa-mkpere afuru ngu l'ọ bu abali-  
   d'egvu.  
 12 Mkpokoro madzu;  
   mbu ejo madzu  
   bulephu uru-onu;  
   be oogudeje aghaphe.  
 13 Oji-bujeru madzu enya;  
   yo gude okpa l'eme  
   iphe-ohubama;

- gude ẹka l'eduphu ibe iya.  
 14 Oogudeje ẹregede l'agba  
 iphe a-tsuru madu.  
 Iphe ọonoje aburu ọkpata okfu;  
 15 Ọ bu iya kparu iphe  
 iphe-ẹhuka a-tu iya l'ukfu;  
 iphe a-byaru iya nu anyaa ya kpoo;  
 k'ophu bu l'e-to natadu ọgvu.  
 16 O nweru uzi iphe ishingu, du Ojejoje ashị;  
 mbu uto iphe esaa bu iya akpamara.  
 17 Iphe ono bu:  
 ọ-ka-onwonye-mma-l'anya;  
 ntuphu-ire; ogbu onye  
 ẹ-ta dudu iphe o meru;  
 18 ọriri ẹjo iphe;  
 ọgba perepere ome iphe du ẹji;  
 19 obobe madu ibo;  
 me onye egudeje okfu  
 kpakaa ufu madu.

*Okwa k'ori ogori*

- 20 Nwa mu; tsojekwa uto,  
 nna ngu kpọ-ziru ngu;  
 ọphu i hajekwa ome iphe  
 nne ngu ezi ngu.  
 21 Kee ya kpukpurukpu l'obu;  
 nggu atukua ya onwongu l'olu;  
 22 ke l'i -je ije;  
 bu iya a-nodu edu ngu.  
 I -ku mgbenya;  
 bu iya a-nodu eche ngu nche.  
 I -muru enya;  
 yoo kfu anu ngu.

- 23 Kẹ l'uzo-wa, a kpọ-ziru  
 ngu-a kwa urọku;  
 iphe eezi ngu aburu iphoro.  
 Mba, aabarụ; gude l'alọo ngu ẹka ẹ nchị  
 aburu ọzo ndzụ.
- 24 Ọ bụ iya e-nwufuje ngu t'ẹ b'ị dalahụ  
 nwanyi, eri ogori l'ẹka;  
 bụru iya e-me tẹ nwanyi,  
 bụ o-dephua-ikoro;  
 be egude ire-machamacha deta ngu.
- 25 Tẹ mma, ọoma;  
 be emekwa t'ọ wata ngu agụgu.  
 Ọphu i kwekwa t'o gude ọnya derita ngu!
- 26 Nwanyi ọkpara emeje nwoke;  
 tọ dūhe iphe ọo-bụ.  
 Nwanyi, eri ogori aburu  
 ishi ndzụ ngu bẹ ọonoduje achị nta iya.
- 27 ?O nwekpooru madzụ  
 nwigbaleke-oma, a-vọta  
 ọku wushi l'ọkpoma  
 tẹ ọku ọbu be eke uwe iya?
- 28 Mbụ; ?o nweru onye e-je ije l'eli icheku-ọku;  
 tẹ ọku bẹ eke iya ọkpa.
- 29 Ọ bụ ẹge ono b'ọ dū onye  
 yele nyee onye ọdo aze.  
 Ẹ to nwekwa onye denyiru  
 nyee madzụ ẹka a-la kẹ mmanu!
- 30 Onye zitaru iphe ria;  
 l'ẹke ẹgu agụ iya;  
 b'ẹ ta akwatajẹkwa gube ọkpobe iphura;
- 31 Obekwanu l'e -gude iya;  
 bẹ ọo-kfụ ugwo iphe ono,  
 o zitaru ono ugbo ẹsaa;

- m'o -ruhuru; o refu iphe  
o nweru kfuà ugwo iya.
- <sup>32</sup> Nwoke, eri ogori te nwekwa egomunggo;  
kẹ l'ọ kwa onwiya b'o  
mebyishi emebyishi.
- <sup>33</sup> Uru, oo-rita iya bụ l'ee-tsu iya iphe;  
meru iphere ye iya l'ifu;  
ọphu iphere iya ta abyadu  
bya agvụ iya agvugvu l'ẹhu.
- <sup>34</sup> Kẹ l'ọ bụ okopho-nwanyi  
akpalije nwoke ẹhu-eghughu.  
E ọọ phujekwaru onye  
rarụ nyee ya imiko;  
m'ọ -bya iya ome iphe.
- <sup>35</sup> E t'ọ dudu iphe e gude  
bya iya aroro, ọo-nata;  
m'o -ruhuru; ọ ha ihagha.

## 7

### *Okwa, aanmaru ndu etso nwanyi okpara*

- <sup>1</sup> Nwa mu; nukwaa iphe mu ekfuru ngu!  
T'iphe-a, mu akpo-ziru ngu  
uzo iya-a ndujekwa ngu l'obu!
- <sup>2</sup> Mejekwa iphe-a, mu ezi  
ngu-a;  
k'ophu ndzụ e-dzu ngu.  
T'ọ bụru ẹge iiletaje  
nwandodo-ẹnya ngu ẹnya;  
bụ ẹge ii-letaje iphe, mu ezi ngu-a.
- <sup>3</sup> Gbaru iya agbaru ẹ  
mkpushi-eka ngu l'ọ ha;  
nggu edee ya edede l'ime obu ngu!

- 4 Kfuru mmamiphe l'oo ya bu  
 nwunne ngu ke nwanyi;  
 nggu ekua iphe-odo-nya: "Egiri onya ngu!"
- 5 O bu iya e-dufuta ngu l'eka  
 nwanyi, eri ogori;  
 te nwanyi, eme k'enyishi eji;  
 be egude ire machamacha deta ngu.
- 6 Ujiku lanu; be mu shi l'onu  
 windo mu pyofu nya;
- 7 phua eke ndu, e te amadu iphe doru.  
 Mu elee nya le ndu  
 ogbo-lanu ono;  
 yo nweru onye lanu ophu,  
 egomunggo swehuru.
- 8 Yebedua echebe ifu l'uzo iya ke nwanyi ono;  
 mbu l'ulo eke nwanyi ono,  
 eri ogori ono bu;
- 9 l'uzo gberegbede urenyashi;  
 mbu l'uzo nchi ejihu; teke ochi ekpuwa eh.
- 10 Ya ndono; nwanyi obu  
 alufuta byakfutashia ya.  
 Nwanyi ono kwaru ngwa  
 l'o bu nwanyi okpara;  
 buru onye eregede.
- 11 O bu nwanyi, eme zuwozuwozuwo;  
 buru nwanyi, e te ekwejedu t'onu rua ya  
 l'ehu.  
 Ophu okpa 'egvujeduru iya egvuru l'ufu.
- 12 I -phua ya l'esu-uzo nta-a;  
 i -bya aphu iya odo; buwunu l'edukfu.  
 Onoje le nkucha;  
 l'achọ onye o-o-buru yele iya.
- 13 Ya ndono; yo duta

- nwata-okoro ono; nmaa ya akpa;  
 bya ekiriberi iya ifu; sụ iya:
- 14 “L’o nweru ngweja, ya jeru  
 egwogwo.  
 Anụ, ya jeru egwogwo nọkwa l’ufu;  
 l’ọ kwa ntanụ; bẹ ya  
 medzuru iphe ya kweru ụkwa iya.
- 15 Ọ kwa iya; bẹ ya lufutaru bya ngu ndzuta.  
 Nggụ ndọ-ọ.
- 16 Oshi-azẹe ya; bẹ ya tọwaru  
 ẹkwa, e dengashiru  
 edengashi, shi Íjiputu.
- 17 Oshi-azẹe mu; bẹ ya gbakwaru męeru;  
 gbaa ya alowesu;  
 mę sinamọnu;  
 k’ọphu ọo-nọdu eshi kwẹkwekwe.
- 18 Bya t’ayi je emee k’enyishi jeye l’utsu.  
 Bya t’ayi je azẹe t’ẹhu tsoo ayi ẹna.
- 19 “Nji mu ta nọkwa;  
 o jekwaruru ẹke, teru ẹnya.
- 20 Okpoga, o gude l’ije ono hakwa l’uru.  
 Ọ kwaru teke ọnwa dzuru bẹ ọo-lata.”
- 21 Yo gude ire-ọma deta iya;  
 gude ire męchemeche kpughaa ya.
- 22 Teke ono teke ono;  
 yọ dụ-kpuru tsoru iya;  
 l’ọ bụ inya, aakpụ eje egbugbu;  
 mbụ l’ọ bụ ele, eje ọdalahu l’ọnya;
- 23 jeye teke akfụ buru iya gungu lẹ meji;  
 l’ọ bụ nwenu, kfulahuru l’ọnya;  
 tọ ma l’ọ bụwa iya anwuhu.
- 24 Nta-a; nwa mu; ngabẹru mu nchị!  
 Gekwa nchị; nua iphe mu ekfuru ngu.

- 25 Be ewokwaru obu ngu dobe  
l'èke nwanyi ono nọ.  
Ophu i phukwa ọzo; tsoru iya;
- 26 kẹ lẹ ndu nwanyi ono mewaru;  
ẹphe adaa hakwa nshinu.  
Ndu, o gbuwaru egbu aka nkụ.
- 27 Ụlo iya bụ ọzo, e shi ala maa.  
Ụzo ono tųgburu nanų jeye l'èke anwųhu  
bu.

## 8

### *Mmamiphe eku ngu oku*

- 1 ?Tọ bụdu oku bẹ mmamiphe eku ẹge ono?  
?Tọ bụdu mkpu;  
bẹ iphe-odo-ẹnya echi ono?
- 2 O nọ l'èke tukogbaaru atukoru l'iku ọzo;  
o vudo lẹ mkpọkahu-ọzo.
- 3 O vudo l'obu-edukfu.  
O nọ l'ọnu-nggamgbo  
l'echi mkpu; sụ:
- 4 “O kwa unubẹ ndiphe bẹ ya eku.  
Unubẹ unwu;  
ọ kwa unu bẹ ya echiru mkpu-a.
- 5 T'iphe dojee unu ẹnya;  
unubẹ ndu ẹ-te nwedu egomunggo!  
Unu akwaa ẹnya;  
unubẹ ndu eswe!
- 6 Unu ngabẹ nchị;  
kẹ l'o nweru iphe ya abya ekfukfu, dų mkpa.  
Ya kpuhawaru ọnu tẹ  
ya kfua iphe vudo nhamụha.
- 7 Iphe eshije iya l'ọnu  
bụ ire-lanụ.

- Ejo-ire oshi iya l'onu bu ebyi.  
 8 Iphe bu okfu, shi iya l'onu kfouru akfouru.  
 E to dudu okfu,  
 gberu nggo; m'o bu okfu,  
 du ghadaghadaghada,  
 eshije iya onu.
- 9 Okfu iya kfouru akfouru  
 le nchi ndu iphe edoje enya;  
 daburu ifu le nchi ndu maru iphe.
- 10 Hakwaa mkpola-ocha;  
 nata iphe ya ezi ngu.  
 Nngu ahaa mkpola-ododo; hata mmamiphe;
- 11 kele mmamiphe kakwa  
 mkpuma, vu oke aswa.  
 E to dukwa iphe agu  
 ngu nu ophu i-turu yeru mmamiphe.

*Mmamiphe ekfu okfu*

- 12 "Mube mmamiphe;  
 mu l'iphe-odo-nya bu l'ekalanu.  
 Mu maru iphe; nya erua mu ali.
- 13 Iphe bu l'aatsu Ojejoje egvu  
 kwa okpo iphe du eji ashị.  
 Oku onwonye;  
 otu onwonye oke epha;  
 iphe du eji;  
 me l'uru-onu aduje mu ashị.
- 14 Idzu oma; me mmamiphe bu nke mu.  
 Iphe-odo-nya; me ike  
 abukwaphuru nke mu.
- 15 O bu mmamiphe;  
 be ndu eze gude achị;  
 buru iya; be ndu ishi gude



- l'atụ ekemu, vudo nhamụnha.
- 16 Ọ bụ mu; bẹ ndu ishi gude achị; bụru mu;  
bẹ ndu ha nshinu gude achị mgboko.
- 17 Ndu yeru mu obu;  
bẹ mu eyejeru.  
Ndu achọshi mu ike  
achọ-vuje mu.
- 18 Ẹku; mẹ ùgvù bụ mu b'ọ nọ l'ẹka.  
Iphe-enweru ọphu a-nọ jeyewaru;  
mẹ ụba bụkwa mu phụ b'ọ nọ l'ẹka.
- 19 Uru, nọ mu l'ime kakwa  
ọkpobe mkpọla-odod.  
Iphe shi mu l'ẹka aka  
ọkpobe mkpọla-ọcha.
- 20 Ụzo, mu eshije bụ ụzo  
odobe-ẹka-ndoo;  
bụru ụzo ikpe,  
vudo nhamụnha bẹ mu etsoje.
- 21 Ndu yeru mu obu; bẹ mu  
emeje t'ẹphe nweru iphe;  
l'emejekwaphu t'ẹku ji ụlo-ẹku ẹphe.
- 22 Ọ bụ mubẹ mmamiphe;  
bẹ Ojejoje vutsukpoo ụzo mee;  
bụru mu bụ ozi,  
o vutsukpoo ụzo jee l'oge ndiche.
- 23 A ọfatahawaru mu rụ teke ẹ ta madu;  
mbụ lẹ mbụlembu ọmanu mgboko adube.
- 24 Ọmanu eze ọnyimu anọdu; bẹ mu nọhawa.  
Mu nọhawa; bẹ nwogvu byaderu.
- 25 Ọmanu e mee eze ugvu,  
dobegbaa l'ọnodu iya;  
mbụ ọmanu e mee  
unwu ugvu nshii;

- bẹ mu nọhawaa.
- 26 Tẹmanu Ojejoje emee mgboko;  
mẹ abasarama iya;  
mbụ tẹmanu e mee udzudzu kẹ mgboko.
- 27 Mu nọ teke o meru igwe;  
nọdu teke o meru akpamigwe;  
yo fozita kephetakota eze ẹnyimu.
- 28 Ya nọ teke o meru; urukpu anọdu l'igwe;  
nọdu teke o meshiru ẹke  
mini eshije amushi l'eze ẹnyimu.
- 29 Ya nọ teke ọ kparu  
eze ẹnyimu òkè ẹke  
oo-jebebeje;  
k'ọphu bụ l'ẹ tọo  
wụ-swetadu òkè iya;  
nọdu teke ọ tọru ntọ-l'alì mgboko.
- 30 Teke ono bụ mu bụ  
o-me-nka, swiru iya nù.  
Mu shi emeje;  
ẹhu l'atsọ iya ẹna  
mbọku-mbọku.  
Mu shi anọduje iya l'ifu  
l'eme ẹmirima tekenteke.
- 31 Mgboko, o meru emeje;  
ẹhu atsọ mu.  
Ndiphe mgburumgburu aduje mu mma.
- 32 Ọo ya bụ; unwu mu;  
unu ngaberu mu nchì;  
Ọnu-ọma bụ k'onye etso mu nù.
- 33 Unu ngabẹ nchì;  
nụa iphe mu ezi unu;  
k'ọphu unu a-maru iphe!  
Unu be efukwa iya lẹ ntụ!

- 34 Ọnu-ọma bụ k'onye  
 angabejeru mu nchi;  
 mbụ onye anọduje  
 l'ọnu-uzo mu l'eche nche mbọku-mbọku;
- 35 ke l'onye chọru mu nụ;  
 chọ-vu mu; be bụkwa ndzụ b'ọ chọ-vuru.  
 Ege ono be ùgvù Ojejoje  
 a-nọdu etsokwa iya phụ.
- 36 Obenu l'onye jikaru mu nụ  
 bụkwa onwiya be oomebetaru.  
 Iphe bụ onye mu dụ ashị  
 bụkwa ọnwu b'ọ chọ."

## 9

### *Mmamiphe; l'ome eswe*

- 1 Mmamiphe gbeshiru je akpua ọlo;  
 bya eworu itso ọsaa gvua ya.
- 2 Yo gbushia anụ; shia dobe;  
 bya akua mọe;  
 shia ite dobe.
- 3 Yọ bya ezi unwu-mgbọko,  
 ejeru iya ozi t'ephe je  
 evudogbaa l'ẹke,  
 katsua l'eli le mkpukpu ono;  
 raa ya arara; sụ:
- 4 "T'iphe bụ ndu egomunggo swehuru bya."  
 Ndu eswe b'ọ sụru:
- 5 "Unu bya eria nri, ya shiru;  
 unu angua mọe, ya kuru dobe.
- 6 Unu haa ome eswe;  
 te ndzụ dzua unu!  
 T'iphe dojenua unu ọnya!

- 7 Onye, abaru onye ụru-ọnu  
     m̀bà  
     bụkwa iphere b'oo jetaru onwiya.  
     Onye ałokwanu ẹjo madzụ  
     ẹka ịe nchị aburu ụswo b'ọ chọ.
- 8 Ba ahujekwa onye ụru-ọnu ọgbo;  
     odumeka be ii-dukwa iya ashi.  
     Bachiaru onye maru iphe mba;  
     nggu aphụ l'oo-yeru ngu obu.
- 9 Lọo onye maru iphe ẹka ịe nchị;  
     nggu aphụ l'oo-kabaaru ọmaru iphe;  
     Kuziaru onye doberu ẹka ndoo iphe;  
     yọ kabaaru ọmaru iphe.
- 10 Ọ kwa ọtsu Ojejoje egvu  
     bụ ẹke mmamiphe duberu.  
     Ọmaru Onye ono,  
     dụ Nso ono aburu iya bụ iphe-odo-ẹnya.
- 11 Kẹ l'ọ bụ yebe mmamiphe  
     e-me t'ị kaa nka;  
     nọribabee ịe mgboko-a.
- 12 Onye maru iphe;  
     be mmamiphe ebuje nggo.  
     Onye ụru-ọnu aburu iya  
     nwẹnkinyi iya e-ri iphe tso iya nụ.”
- 13 Nwanyị, eme eswe;  
     be olu iya anọduje ada  
     eli eli.  
     E ta hụdu iya àhùhù;  
     to nwe iphe ọ maru.
- 14 Ọ dughajeru l'ifu ibo iya.  
     Eke, kakọta l'eli ịe  
     mkpukpu aburu ẹke,  
     o jeje je asugabe onwiya;

- 15 l'eku iphe bu ndu eswe esweswe,  
 ejeru iphe ephe eje:  
 16 "Tiphe bu onye eswe bata eke-a!"  
 Ndu ophu egomunggo  
 swehuru be osuje:  
 17 "Le mini, e zitaru ezita adujekwaa mma;  
 nri, e riru le mpya  
 aburu iya kakota otso ena!"  
 18 Obenu l'ephe ta madu  
 le ndu, no l'ulo iya buwa ndu maa.  
 Ndu, byaru iya ebyee anoduwa l'ali-maa.

## 10

### *Etu, Solomonu nmashiru*

- 1 Owaa etu, Solomonu nmashiru:  
 Nwata, maru iphe;  
 emeje t'ehu tso nna iya ena.  
 Obenu le nwata, eme eswe;  
 abujeru aphu tso nne iya.  
 2 Eku, a kparu l'uzo,  
 e-ta dudu mma; ta agajekwa mkpa.  
 Obenu l'odobe-eka-ndo  
 adzofutaje madzu l'onwu.  
 3 Ojejoje ta ahajekwa onye  
 doberu eka ndoo t'egu mee ya.  
 Obenu l'ejo madzu;  
 b'e too kwejedu t'iphe  
 agu iya nu rube iya eka.  
 4 Enyiri atujekwa madzu ukpa.  
 Obenu l'akanya emeje madzu t'o bahu.  
 5 Onye kpataru iphe o koru  
 kwakobe l'oge bu onye  
 nweru egomunggo.

- Obenu l'onye bu mgbenya;  
 be ookuje teke aakpata iphe  
 akpata bu iphe-iphere b'ọ bu.
- 6 Onye doberu ẹka ndoo;  
 bu onu-oma etsoje iya.  
 Obenu l'ejo madzu edomije  
 ejo iphe no iya l'obu.
- 7 Qobuje; a -nyata onye  
 doberu ẹka ndoo;  
 ẹhu atsọo madzu ẹna.  
 Obenu l'ejo madzu; be aazahaje.
- 8 Onye maru iphe l'obu iya  
 emeje iphe a suru t'o mee.  
 Obenu l'onye ekfu yayaya alaje l'iyi.
- 9 Onye ntupo ta nodu l'ẹhu  
 anoje ndzu iya le domangu rimangu.  
 Obenu l'onye ntuphu-ire;  
 be ee-mekochaa kparu.
- 10 Onye aji-buru madzu ẹnya;  
 kwa iphe-ẹhuka b'ọ  
 kwakoberu onye obu.  
 Obenu l'onye atu mba iya too;  
 kwa nchi-odu-ndoo b'ọ cho.
- 11 Onu onye doberu ẹka ndoo  
 bu nggele mini ndzu.  
 Obenu l'ejo madzu edomije  
 ejo iphe no iya l'obu edomi.
- 12 Ndumashi akpataje okfu.  
 Obenu le n-yemobu  
 ekpuchije ejo iphe iphe.
- 13 Mmamiphe bu l'onu  
 onye iphe edoje ẹnya  
 b'a cho-vuje iya.

- Obenu l'onye eswe;  
 bẹ ẹchachi anọduje eche echeche.
- 14 Ndu maru iphe akwakọbeje  
 iphe ẹphe maru akwakọbe.  
 Obenu l'ọnu onye eswe  
 bụ iphe-ẹhuka b'ọ nọduje eku oku.
- 15 Ẹku bụ ike, onye nweru.  
 Ụkpa abụkwanuru iya egbuje onye ụkpa.
- 16 Ụgwo ozi, onye  
 doberu ẹka ndoo bụ ndzụ.  
 Obenu l'ẹjo iphe emeje  
 tẹ madzụ kabaaru ome eji.
- 17 Onye angabeje nchị teke  
 a kpọ-ziru iya ụzo bụkwa  
 ụzo ndzụ bẹ ootso.  
 Obenu l'onye a baru mba;  
 yọ jịka iya kwa ụzo bẹ oophu.
- 18 Onye madzụ dụ ashị;  
 yo me t'ẹ b'a ma kwa onye ẹjo-ire b'ọ bụ.  
 Onye ntumatu aburu onye eswe.
- 19 Okfu -paa l'igwe;  
 ẹjo iphe abata iya.  
 Obenu l'onye kwaru  
 ẹnya atajẹ ire iya ẹra.
- 20 Ire onye doberu ẹka ndoo  
 dụ l'ọ bụ ọkpobe  
 mkpọla-ọcha.  
 Obenu l'ọriri ẹjo madzụ  
 ta kwatajẹkwa aga mkpa.
- 21 Okfu onye doberu ẹka ndoo  
 azuje igweligwe madzụ.  
 Obenu lẹ ndu eswe eyifuje;  
 okfu l'ẹphe te nwe egomunggo.

- 22 Ọnu-ọma, shi Ojejoje l'ẹka  
emeje tẹ madzụ nweru iphe;  
ọphu 'onwedu iphe-ẹhuka, ooyekobeje iya.
- 23 Iphe aduje onye eswe mma bu ome ẹjo iphe.  
Obenu l'ọo mmamiphe  
bu iphe aduje onye iphe doru ẹnya mma.
- 24 Ọ kwa iphe ẹjo-madzụ atsu  
egvu bu iphe emekochaje byaru iya.  
Obenu l'ọ kwanu iphe agu  
onye doberu ẹka ndoo e-meru iya.
- 25 Ọ bu ẹge oke pherephere epheje; pheswee  
bu ẹge ndu ẹjo madzụ aphụ-sweje.  
Obenu l'onye doberu ẹka ndoo  
e-vudoshi ike gbururu jeye.
- 26 Ọ bu ẹge mee, shihuru uka anwuje onu;  
mbu ẹge ẹnwuru-ọku ahuje  
ọku l'ẹnya bu ẹge onye  
ẹnyiru aduje onye ezi iya ozi.
- 27 Ọtsu Ojejoje egvu emeje tẹ madzụ kaa nka.  
Obenu le ndu ẹjo madzụ  
agbajihuje agbajihu.
- 28 Iphe onye doberu ẹka ndoo  
anọduje ele ẹnya iya bu ẹhu-otso-ena.  
Obenu l'iphe ẹjo madzụ  
ele ẹnya iya ta gajeduru iya.
- 29 Oshi ọzo ke Ojejoje bu  
agbabe-a-dzuru ke ndu doberu ẹka ndoo.  
Obenu le ndu ẹjo madzụ b'ọ bujeru iyi.
- 30 Ndu doberu ẹka ndoo;  
b'e ta agwafu-ghekwa agwafu.  
Obenu le ndu ẹjo madzụ tee bukwa l'ali ono.
- 31 Ọnu onye doberu ẹka ndoo  
bu iphe eshije iya nu bu mmamiphe.



- Obenu l'onye te kfujedu  
ire-lanụ;  
bẹ ee-mekochaa bufu ebufu.
- 32 Onye doberu ẹka ndoo  
maru iphe bụ: o -kfua ya;  
yọ kfuru nhamunha.  
Obenu l'iphe eshije  
ejo madzụ ọnu bụ ejo okfu.

## 11

- 1 Oye ẹregede l'igwe,  
eegude atụ iphe kwa  
akpamara l'ẹke Ojejoje nọ.  
Obenu l'ogude ọkpobe iphe,  
eegude atụ iphe tụa ya aduje iya mma.
- 2 Ekuku -vuta ụzo; iphere etso iya.  
Obenu l'ọdu-agu -vuta ụzo;  
mmamiphe etso iya.
- 3 Iphe anọduje edu ndu  
obu gụru iphoro bụ ire-lanụ.  
Obenu l'iphe egbuje ndu  
ẹ te gudedu ire ẹphe ẹka  
bụ ntuphu-ire.
- 4 Mbọku, Nchileke e-koshi  
ẹhu-eghughu iya;  
bẹ ẹku, madzụ kpataru  
te eyekwaru onye ọbu ẹka.  
Obenu l'iphe adzọfutaje  
madzụ l'ọnwu  
kwa odobe-ẹka-ndoo.
- 5 Iphe abọjeru onye uta  
ẹ-ta dudu lẹ ndzụ iya ụzo  
kwa odobe-ẹka-ndoo.

- Obenu l'ẹjo madzụ bu  
 ẹjo iphe iya ono emeje t'ọ daa.
- 6 Iphe adzoje ndu ire-lanụ bu  
 odobe-ẹka-ndoo.  
 Obenu lẹ ndu ẹ te gudedu  
 ire ẹphe ẹka bu ẹjo iphe ẹphe  
 ahataje ẹphe l'onye.
- 7 Ẹjo madzụ -nwuhu;  
 iphe oole ẹnya iya anashihu iya.  
 Iphe o shi gbaa ego  
 lẹ ya e-gude ike iya mee  
 aburu ke mmanu.
- 8 Onye doberu ẹka ndoo;  
 be aadzofoje l'iphe-ẹhuka;  
 iphe-ẹhuka obu alaaru ẹjo madzụ.
- 9 Onye ẹ-te emedu ele Nchileke;  
 bu iphe shi iya l'onu;  
 be oogudeje emebyishi  
 ibe iya.  
 Obenu l'onye doberu ẹka ndoo  
 bu mmamiphe be adzoje iya nu.
- 10 Iphe oma -gbaaru onye  
 doberu ẹka ndoo;  
 ndu bu lẹ mkpukpu ono etee ẹswa.  
 Ẹjo madzụ -nwuhu;  
 ndiphe etee ẹswa.
- 11 Onu, onye obu guru iphoro  
 goru akwo-lije mkpukpu.  
 Obenu l'onu, ẹjo-madzụ  
 emebyije iya emebyi.
- 12 Onye ẹ-te nwedu egomunggo  
 akpoje ibe iya  
 ẹbo-ẹbo-l'afu.

- Obenu l'onye nweru egomunggo  
atajẹ ire iya ẹra.
- 13 Onye sùruku-sùku  
ekfukashije iphe e domiru edomi.  
Obenu l'onye e gude  
ire iya ẹka edomije iphe dọ kẹ edomi.
- 14 Oha, ẹ-te nwedu onye  
akpọ-ziru ẹphe ọzo adajẹkwa.  
Obenu lẹ mkpukpu,  
aadu l'igwe akpọ-ziru ọzo b'a dzoje.
- 15 Onye naru onye ẹ tọ madu  
mkpalẹka bukwa okfu;  
be ookotaru onwiya.  
Obenu l'onye ẹ-ta nadu madu mkpalẹka;  
be nchi a-du ndo.
- 16 Okpobe nwanyi;  
be nweru ọgvu.  
Eku aburu kẹ ẹjo nwoke.
- 17 Onye, aphuru madu imiko bu onwiya;  
be oomeru ohuma.  
Obenu l'ẹjo madu bu  
iphe-ehuka be okpataru onwiya.
- 18 Eku, ẹjo madu akpa  
bu iyi b'ọ buru iya.  
Obenu l'onye doberu ẹka ndoo;  
be obunggo iya anoje jeye.
- 19 Onye odomu edotaje iya ndu.  
Obenu l'onye achi nta  
ẹjo iphe bu onwu iya b'ọ cho.
- 20 Ndu ẹjo okpoma aduje  
Ojejoje ẹkpanashi.  
Obenu lẹ ndu uta,  
ẹ-ta ndu l'ehu aduje iya mma.

- 21 Maru amaru lẹ ndu  
 ẹjo-madzu b'ẹ ta hadu kẹ manu.  
 Obenu lẹ ndu doberu ẹka  
 ndoo ta dudu iphe e-me ẹphe.
- 22 Nwanyi, ama mma;  
 t'ọ ma oye onu l'okfu  
 du l'ọ bu echi  
 mkpọla-ododo, eeyeru ezi l'onu-imi.
- 23 Iphe agụ onye doberu ẹka  
 ndoo bu l'oma bẹ ọosubeje ishi.  
 Obenu l'iphe ẹjo madzu  
 ele ẹnya iya bu l'ẹke  
 ọosubeje ishi bu  
 l'oke ẹhu-eghughu,  
 Nchileke a-byabẹ iya.
- 24 Onye asa ẹka asasa anọduje aba ababa eje.  
 Obenu l'onye ukparaswi  
 emekochajee buru onye ukpa.
- 25 O-me-l'uko abajẹ ụba;  
 onye emeje t'ẹhu gua ibe iya egugu;  
 bẹ ee-mekwaphu t'ẹhu gua yẹbedua egugu.
- 26 Onye domiru nri;  
 t'o gude kpọ-lia aswa iya;  
 bẹ ndiphe ebujeru onu.  
 Obenu l'onye reru nk'iya  
 l'ògè iya bẹ aajajẹ ajaja.
- 27 Onye achọ t'iphe du mma;  
 bẹ ọma etsoje.  
 Obenu l'onye achọ ẹji;  
 bẹ ẹji etsoje.
- 28 Onye kpọru obu yeru ẹku a-dakwa.  
 Obenu l'onye doberu ẹka ndoo;  
 a-nọdu aja pulapula l'ọ bu

- mkpẹkwo onyingu.  
 29 Onye, akparu ndibe iya okfu;  
 te nwekwa iphe oo-keta.  
 Onye eswe aburu iya  
 e-mekochaa jeeru onye maru iphe ozi.  
 30 Nebyi, onye doberu ẹka ndoo amije;  
 bu oshi, anu ndzu.  
 Onye aduje ike kfuta madzu  
 aburu onye maru iphe b'ọ bu.  
 31 Ọ -buru le ndu doberu ẹka  
 ndoo be eebu je nggo le mgboko-a;  
 bunu iya bu le ndu ẹ-te  
 emedu ele Nchileke;  
 me ndu ejo iya ono  
 aa-natakwapu ugwo iya nk'ephe.

## 12

- 1 Onye a baru mba;  
 yo nata iya;  
 kwa mmamiphe b'ọ nataru.  
 Obenu l'onye jikaru mba,  
 a baru iya; kwa onye eswe b'ọ bu.  
 2 Ọkpobe madzu atubaja Ojejoje l'obu.  
 Obenu l'onye ẹregede;  
 be onmaje ikpe.  
 3 Madzu t'e gudeghekwa  
 ejo iphe buru.  
 Obenu l'onye doberu ẹka  
 ndoo b'e ta vu-ghekwa l'ogvu.  
 4 Ọkpobe nwanyi bukwa ugvu nji iya.  
 Obenu l'ejo nwanyi dukwa  
 l'ọ bu okpu, tsuru ume nodu nji l'ehu.  
 5 Idzu, ndu doberu ẹka ndoo abuje k'oma.

- Obenu lẹ ntuzi-ẹka ndu  
 ẹjo iya ono abukotaje ugho.
- 6 Okfu, shi ẹjo madzụ l'ọnu  
 abuje ọnya nma onye, ookfuru iya.  
 Obenu l'ọnu onye obu iya  
 guru iphoro adzoje madzụ.
- 7 Ndu ẹjo iya ono;  
 be ee-mekochaa kwatsushia; ẹphe achihu.  
 Obenu l'ọnu-ulo onye  
 doberu ẹka ndoo a-kfuru gidimu.
- 8 Ọ bu ẹge madzụ mataberu iphe;  
 bu ẹge aajatabeje iya.  
 Obenu lẹ ndu obu ẹ-ta  
 gudu iphoro be aakpofu akpofu.
- 9 Ọ kakwa mma l'i bu onye  
 ẹ-ta gubedu iphe;  
 nggu ese ẹge ii-shi buru;  
 me l'i guberu onwongu iphe  
 l'e b'o du ẹge o haru ngu.
- 10 Onye doberu ẹka ndoo  
 akwabejeru elu iya ẹnya.  
 Obenu l'imiko, ẹjo madzụ  
 aphuje bu ẹjo-obu.
- 11 Onye akọ alị iya enweje nri;  
 nwee ya k'etsutsu.  
 Obenu l'edegiri;  
 bu onye eswe b'o bu.
- 12 Ejo madzụ bu iphe  
 a nataru lẹ nfu be ẹnya iya anoje.  
 Obenu l'onye doberu ẹka  
 ndoo anoduje aja pulapula.
- 13 Ejo madzụ bu ẹjo okfu,  
 shi iya l'ọnu abuje ọnya; hata iya.

- Obenu l'onye doberu ẹka  
ndoo anahuje iphe-ẹhuka.
- 14 O kwa madzu egudeje  
onu kfutaru onwiya iphe-oma.  
Ono kwaphu ẹge ooshije  
l'iphe oogude ẹka iya eme;  
metaru onwiya obunngo.
- 15 Iphe bu iphe onye eswe eme  
adukotaje iya mma l'anya nk'iya.  
Obenu l'onye maru iphe  
egeje nchi teke a kpọ-ziru iya ọzo.
- 16 A -kpatsua onye eswe iwe;  
yo mewaphu t'a maru teke ono.  
Obenu l'onye nweru egomunggo  
eleswetaje iphe-phere,  
e meru iya.
- 17 Onye gude ire-lanu  
l'agba ekebe;  
be okfu iya ayikoje ayiko.  
Obenu l'ejo ekebe abujeru ọgho.
- 18 Okfu, ẹ ta aridu ariri kfua;  
aruje kfuu l'ọ bu ogu-mbeke.  
Obenu l'okfu onye  
maru iphe edokwaje iphe edokwa.
- 19 Ire-lanu anoje jeye l'ojejoje.  
Obenu l'ejo-ire te nwedu ẹge ọono-beje.
- 20 Iphe ejije ndu ejo idzu okpoma bu ọgho.  
Obenu le ndu idzu-oma;  
be ẹhu-otso-ena bu nk'ephe.
- 21 Ejo iphe te emejekwa onye  
doboru ẹka ndoo.  
Obenu l'iphe-ẹhuka  
bu ke ndu ejo iya ono.

- 22 Onye ẹjo-ire aduje Ojejoje ashì.  
 Obenu ẹ ndu emeje iphe,  
 ẹphe kfuru aduje iya mma.
- 23 Onye nweru egomunggo  
 ta arakashijekwa iphe o maru arakashì.  
 Obenu ẹ ndu eswe  
 anọduje avọshi mkpọkoro okfu.
- 24 Onye gude ẹka iya esebashi;  
 e-mekochaa bụru ishi.  
 Obenu l'onye ẹnyiru  
 e-mekochaa bụru ohu.
- 25 Ọchi obu l'ẹka emeje  
 tẹ ike gvụ madzụ.  
 Obenu l'okfu-ọma emeje;  
 ẹhu atso iya ẹna.
- 26 Ọkpobe madzụ eduzije ọnyà iya ọzo.  
 Obenu l'ẹjo-madzụ  
 eduphujẹ madzụ ọzo.
- 27 Onye ẹnyiru ta adujedu ike  
 ọnu onwiya nri.  
 Obenu l'onye akanya;  
 bẹ iphe o nweru abuje iphe vu oke aswa.
- 28 Odobe-ẹka-ndoo bụ ọzo ndzụ;  
 oshiswe ọzo aburu ọnwu.

## 13

- 1 Nwa, maru iphe anuje iphe  
 nna iya ekfuru iya.  
 Obenu l'epherephere;  
 ta angajedu nchì ẹ mba, aabaru iya.
- 2 Madzụ egudeje ọnu kfutaru  
 onwiya iphe-ọma.  
 Obenu l'onye ẹ te gudedu ire iya ẹka;



- bụ k'ehuka bụ iphe anọduje agụ iya.
- <sup>3</sup> Onye afọ okfu, ookfu afọfo  
 bụ ndzụ iya b'o che nche.  
 Obenu l'o-kfu-ļę-njakonu;  
 e-mekochaa laa l'iyi.
- <sup>4</sup> Onye ẹnyiru; bę ękpiri anoje;  
 ọbu l'ẹ tọ dudu iphe eru iya ẹka.  
 Obenu l'onye akanya;  
 bę iphe agụ iya nụ eruje ẹka.
- <sup>5</sup> Onye doberu ẹka ndoo;  
 bę ejo-ire aduje eji.  
 Obenu l'ejo madzụ bụ  
 iphe-iphere;  
 buru iphe aakpofu akpofu.
- <sup>6</sup> Onye uta ẹ-ta dudu l'ẹhu iya;  
 bụ odobe-ẹka-ndoo  
 anọduje eche iya nche.  
 Obenu l'ejo madzụ;  
 bụ ejo iphe iya ono enwutsuje iya.
- <sup>7</sup> O nweru onye anọduje eme  
 l'ò bụ eze madzụ;  
 a ma l'ẹ to nwedu ẹge ọ ha iya.  
 Nweru onye anọduje eme  
 l'ò bụ onye ụkpa;  
 a ma l'o nweru iphe; nweshia ya ike.
- <sup>8</sup> Madzụ egudeje ẹku,  
 ọ kpataru gbata ndzụ iya.  
 Obenu l'onye ụkpa;  
 ta dudu iphe eyeje iya egvu.
- <sup>9</sup> Onye doberu ẹka ndoo  
 dụ l'ọ bụ iphoro;  
 ji ẹke ọ nọ.  
 Obenu l'ejo madzụ;

- dụ l'ọ bụ urọku, bụ:  
 ọ -nonyaa; yọ nyihu.
- 10 Oku onwonye ekuku;  
 bụ ụswo b'ọ kpatajẹ.  
 Obenu lẹ mmamiphe;  
 bụ ndu, kweru t'a kpọ-ziaru ẹphe ụzo.
- 11 Okpoga, e gude ụgho dzuta  
 anọduje ala azụ azụ.  
 Obenu l'onye gude ẹka iya;  
 tọ nwehu kpaa okpoga emeje iya;  
 yọ ka nshinu akaka eje.
- 12 Iphe madzụ leri ẹnya iya;  
 e mekochaa to ruhe iya ẹka;  
 bẹ emeje tẹ meji nmafụ iya.  
 Obenu l'iphe agụ madzụ -rua ya ẹka;  
 b'ọ duje iya l'ọ bụ oshi,  
 anụ ndzụ.
- 13 Onye aalọ ẹka lẹ nchị;  
 to nwe iphe ọ gụberu iya  
 achọkwaru onwiya  
 ishi-ephuhu.  
 Obenu l'onye eme iphe  
 ekemu kfuru bẹ obunggo iya nọkwaru.
- 14 Iphe onye maru iphe ezi;  
 dukwa l'ọ bụ ẹke mini, anuje ndzụ futaru.  
 Oomeje tẹ madzụ ba ada l'onya,  
 anwuhu gbarụ.
- 15 Onye, nweru egomunggo;  
 bẹ aduje ndiphe l'obu.  
 Obenu l'uzo onye ẹ te  
 gudedu ire iya ẹka adujeru iya ẹhuka.
- 16 Onye nweru egomunggo  
 egudeje mmamiphe eme iphe oome.

- Obenu l'onye eswe ewotaje  
ome-eswe iya ono t̄a jalangu.
- 17 Ējo nwozi akpataj̄eru madz̄u iphe-̄huka.  
Obenu l'ozi, e ziru onye,  
e gude ire iya ̄ka;  
b̄u ̄hu-agu b'̄o n̄uje.
- 18 Onye, aah̄u àh̄uh̄u;  
t̄o nga nchi;  
b̄e ̄kpa abyaj̄ekwaru;  
iphere egude iya.  
Obenu l'onye aah̄u àh̄uh̄u;  
ȳo n̄a ya; b̄e aakwabeje ugvu.
- 19 Iphe aḡushi madz̄u ike  
-rube iya ̄ka; b̄e ̄hu atsoje iya ̄na.  
Obenu l'onye eswe;  
b̄e ̄otsuje l'̄ehu ̄ha ̄jo iphe.
- 20 Onye ȳele ndu mmamiphe ayi;  
a-b̄uru onye maru iphe.  
Obenu l'onye etso ndu eswe;  
ejeje iphe-̄huka.
- 21 Iphe-̄huka an̄oduje achi  
̄jo madz̄u ̄so.  
Obenu l'̄uba; b̄ukwanu  
obunggo onye doberu ̄ka ndoo.
- 22 Okpobe madz̄u akpaj̄e ̄ku d  
oberu nwanwanwaranwa iya.  
Obenu l'̄ejo madz̄u b̄u ndu  
doberu ̄ka ndoo;  
b'̄o kpaj̄e ̄ku edoberu.
- 23 Onye, b̄u onye ̄kpa;  
b̄e al̄i iya a-n̄odu emehuru iphe.  
Obenu l'e gudeje ̄jo ikpe;  
kpefu iya al̄i ̄bu l'̄eka.

- 24 Onye ẹ-ta ahùdù nwatibe iya ahùhù;  
kwa ashì bẹ nwata ọbu dù iya.  
Obenu l'onye yeru nwatibe iya  
obu ezije obu l'alì l'ahù iya.
- 25 Onye doberu ẹka ndoo erijije ẹpho.  
Obenu l'ejo madzù bẹ ẹgu emeje.

## 14

- 1 Nwanyi, maru iphe  
ajikobeje ọlọ iya ajikobe.  
Obenu lẹ nwanyi ọphu bụ  
onye eswe egudeje ẹka iya  
l'akpaka ọlọ iya akpaka.
- 2 Onye obu gụru iphoro  
anọduje atsù Ojejoje egvu.  
Obenu l'onye ọzo iya  
dù nggọdogo-nggọdogo  
ta dudu iphe ọgubeje Ojejoje.
- 3 Onye eswe ekfutaje iphe  
ochi-echachi kpube onwiya.  
Obenu l'ọnu ndu maru iphe  
anọduje eche ẹphe.
- 4 Eswi, e gudeje akọ iphe  
'anọdu; ọko nri adu.  
Obenu l'eswi -jeshia ozi ike; nri atọa ẹgu.
- 5 Onye ekebe, e gude  
ire iya ẹka; ta adzujekwa ẹjo-ire.  
Obenu l'onye ẹjo ekebe;  
bù ẹjo-ire anọduje afushi iya l'ọnu.
- 6 Onye ọru-ọnu achoje  
mmamiphe; tọọ phụ iya.  
Obenu l'onye nweru  
egomunggo;

- bẹ ọmaru iphe aduje ntse.
- 7 Bujekwaru ọba yeru onye eswe;  
kẹ l'ẹ tọ dudu iphe ii-shi iya l'ẹka amuta.
- 8 Iphe ekoshije l'onye nweru  
egomunggo maru iphe bu  
l'uzo iya edoje iya enya.  
Obenu l'iphe ekoshije l'onye eswe  
ta madu iphe bu l'oo ugho;  
bẹ oogudje eme iphe.
- 9 Onye eswe egudeje ejo iphe atụ mgbonu.  
Obenu l'onye obu guru iphoro  
anoje Ojejoje l'obu.
- 10 Onyenonu amajeru iphe atsụ iya l'ehu;  
To nwe onye yele ibe iya  
gba l'ehu-otso-ena ya.
- 11 Ufu ejo madzu;  
bẹ ee-chikpo.  
Obenu l'ulo onye doberu ẹka  
ndoo a-nodu aja aja eje.
- 12 O nweru uzo, abuje;  
madzu eshi iya;  
yo du iya l'o bu okpobe uzo.  
Obenu l'ẹke o suseru ishi bu anwuhu.
- 13 Iwe tso ochi;  
nggumaphu etsoru  
ehu-otso-ena.
- 14 Ndu ẹ te gudedu ire ephe ẹka  
a-nata ugwo iphe ephe meru.  
E bua ndu eme ohuma  
nggo iphe ephe meru.
- 15 Onye mapeteru iphe  
ekwetaje iphemiphe obule.  
Obenu l'onye nweru egomunggo

- arije-odu oriri; maru eke oo-ye okpa.
- 16 Onye maru iphe atshuje Ojejoje  
 egvu haa ome ejo iphe.  
 Obenu l'onye eswe emeje lokaralokara  
 tubesu l'oo iphe gbarunu;  
 be ya eme.
- 17 Onye okpoma-oku emeje eswe-eswe;  
 ophu bu onye enya ruru ali ataji nshi.
- 18 Ome-eswe edujeru madzu ye l'ome-ririri.  
 Obenu l'onye obu ruru ali  
 ekpujeru mmamiphe l'oo bu okpu-eze.
- 19 Ndu ejo iya ono e-byiru  
 ndu ophu eme ohuma ikpere;  
 Ndu akirishi abya aru  
 l'onu-uzo ndu doberu eka ndoo.
- 20 Ufu onye ejo-eka teru enya;  
 mbu tee ya jeye le ndu obutobu iya.  
 Obenu l'oke amadu enweje ndu onya l'igwe.
- 21 Onye e-ta gubedu obutobu iya iphe;  
 kwa ejo madzu b'oo bu.  
 Obenu l'onu-oma bu  
 k'onye, emejeru ndu ukpa iphe-oma.
- 22 Ndu anoduje t'oo tsuru ibe ephe;  
 ?to budu eji, ephe eme iya too?  
 Obenu le ndu anoduje t'oo  
 duru madzu le mma;  
 be eeyejeru obu;  
 l'emeru ephe ire-lanu.
- 23 Iphe bu akanya, madzu ese; be uru anojekwa.  
 Obenu l'onye bulephu onu  
 b'oo phoduru iya; be ukpa kwa nk'iya.
- 24 Eku bu nggo, eebuje onye maru iphe.  
 Obenu l'onye eswe

- bulephu eswe iya ono;  
b'e gudeje maru iya.
- 25 Onye gude ire-lanụ  
l'agba ekebe adzọkwa ndzụ.  
Obenu l'onye gude ụgho  
l'agba ekebe bụ  
o-deru-oye; b'ọ bụ.
- 26 Onye atsu Ojejoje egvu;  
bụ onye dakoberu  
agburu-anyị.  
Eke ono aburu unwu iya  
a-gbabe-a-dzuru.
- 27 Otsu Ojejoje egvu;  
bụ ishi nggele, ndzụ shi atsoshi.  
O bụ iya emeje tẹ madzụ  
ba adalahu l'onya, anwuhu gbaru.
- 28 O bụ gidigidi bụ ugvu eze.  
Obenu l'onye ishi ẹ-te nwedu madzụ;  
be yifuakwaru nụ.
- 29 O kwa ọta-nshi emeje tẹ  
iphe doo madzụ ọnya.  
Obenu l'onye ọkpoma-ọku  
eme tẹ ndiphe maru ẹge eswe iya hatabe.
- 30 Obu-odoo emeje t'ẹhu dụ madzụ npho.  
Obenu l'ijimọnya atsujẹ ọkpu ume.
- 31 Onye akpa onye ụkpa ẹhu;  
bukwa Nchileke, meru iya nụ;  
b'o me iphe-iphere.  
Obenu l'onye emeru onye,  
ẹ-tọ dudu ẹge ọ haru iya ọhuma;  
kwa Nchileke b'ọ kwabe ugvu.

- 32 Iphe aḷo-tsuje ẹjo madzụ;  
     bụ ẹjo iphe oome.  
 Obenu l'onye doberu ẹka ndoo  
 nweru ẹke ọo-nọdu;  
     zeeru ndzụ;  
 m'o -ruhuru ọ nwụhu anwụhu.
- 33 Mmamiphe anọje l'obu ndu  
     iphe doru ẹnya.  
 Obenu ịe ndu eswe ta madụ kẹ mmamiphe.
- 34 Odobe-ẹka-ndoo emelije mba emeli.  
 Obenu l'ẹjo iphe bụ iphe-iphere  
 nọduru iphe, bụ ọha, nọnu.
- 35 Nwozi, maru iphe;  
     bẹ eze enweje ifu-oma  
     l'ẹke ọ nọ.  
 Obenu ịe nwozi,  
 emechishi eze ifu;  
 b'ọ tų-koshije ẹhu-eghughu iya.

## 15

- 1 Olu-odoo eselaje nseku azụ.  
     Obenu l'okfu ẹhuka  
     akpalije ọvuma.
- 2 Ire onye maru iphe  
     ekoshije mmamiphe.  
 Obenu l'onye eswe  
     bụ okfu eswe anọje iya l'ọnu.
- 3 Ẹnya Ojejoje dzuru ẹkemekẹ ọbule:  
     l'ẹke ndu ẹjo iya; mẹ kẹ ndu ọma.
- 4 Gberuma eji obu oyi;  
     ghẹlegheleghele eye ọku l'obu.
- 5 Ọ bụ onye eswe anyijeru ẹtsù  
     kpua l'ụzo, nna iya akpọ-ziru iya.



- Obenu l'onye  
egomunggo  
ruru ali; angabeje nchi l'iphe eezi iya.
- 6 Ulo onye doberu eka ndoo; be eku ejije ejiji.  
Obenu l'ejo madzu;  
bu iyi abyaje eku iya ndzuta.
- 7 Onye maru mmamiphe  
anoduje araka iya araka  
t'o dzuru onyemonye obule.  
Obenu l'onye eswe;  
be okpoma iya ta dudu ege ono.
- 8 Eja, ejo madzu egwo;  
kwa akpamara l'enya Ojejoje.  
Obenu l'ekfukfu, onye obu  
guru iphoro ekfu anu iya abaje iya l'obu.
- 9 Uzo, ndu ejo madzu eshi  
abuje akpamara l'ifu Ojejoje.  
Obenu le ndu ese t'ephe  
dobe eka ndoo b'o yejeru obu.
- 10 O kwa chikikfuu bu k'onye  
haru okpobe uzo ono.  
Onwu aburu k'onye  
o du ashi teke aahu iya ahuhu.
- 11 Ali-maa; me o-la-l'iyi  
dabukotaru eba l'ifu Ojejoje.  
?Bu-chia obu madzu  
te gheduru iya onu l'ifu to?
- 12 Onye uru-onu avojeru oku  
ghu ehu teke a baru iya mba.  
Ophu o kwejedu kpanyabe  
ndu maru iphe ehu.
- 13 Ehu-otso-ena emeje  
t'ifu tusahu madzu atusahu.

- Obenu l'aphu akpataje ike agvugvu.
- 14 Onye obu ruru ali anoduje achọ mmamiphe.  
Obenu l'onye eswe bulephu  
ririri b'ọ noduje ekfu.
- 15 Onye, aakpa ehu;  
be ndzu iya abukotaje  
iphe otsu-l'ehu.  
Obenu l'onye okpoma tusahuru atusahuru  
be tekenteke abujeru iya aji.
- 16 O ka mma le madzu  
nwepeteru iphe enwepete;  
l'atsi Ojejoje egvu;  
me l'eku, o nweru; dzuru mgboko;  
iphe-ehuka eswiru iya.
- 17 O ka mma l'oo mkpekwo;  
buwaphu nri, nonu;  
e gude n-yemobu l'ata iya;  
ma l'e gburu okpalukpo;  
gude ntafashi-ifu l'ata iya.
- 18 Onye obu-okwu akpalije okfu akpali.  
Obenu l'onye, ataru  
okfu nshi  
anoduje abyanyi uswo abyanyi.
- 19 Iphe onye enyiru yeru eka  
aduje l'e gude ogvu  
tu-chishia ya atu-chishi.  
Obenu le ke onye  
obu guru iphoro  
aduje werewere.
- 20 Nwata, maru iphe emeje  
t'ehu tso nna iya ena.  
Obenu l'onye eswe;  
be nne iya aduje ashi.

- 21 Ome eswe atsoje onye  
 ẹ-te nwedu egomunggo ẹna.  
 Obenu l'onye nweru egomunggo  
 emeje iphe iya; yọ kfulu nhamunha.
- 22 Onye ẹ-te nwedu onye  
 atuziru iya ọzo;  
 te nwekwa iphe oomekotajedu.  
 Obenu l'a -dụ l'igwe chĩa idzu;  
 e mekota iphe a tũberu.
- 23 Madzụ -yee ọnu l'okfu yechata iya;  
 bẹ ẹhu atsoje iya ẹna.  
 Ọnu, e yeru l'o ruberu iya aburu iphe ugvu.
- 24 Onye maru iphe echibeje ifu  
 l'uzo ọphu edu ala lẹ ndzụ;  
 onye eswe echebe nk'iya  
 l'uzo ọphu edu ala l'ọku alị-maa.
- 25 Onye eku onwiya ekuku;  
 bẹ Ojejoje enwutsuje.  
 Obenu lẹ nwanyi, nji iya  
 ẹ-ta nọhedu b'ọ dzọtajeru alị iya.
- 26 Ọriri, ẹjo madzụ arị bụ  
 akpamara l'ẹke Ojejoje nọ.  
 Obenu l'ọriri kẹ ndu ọma aduje iya mma.
- 27 Onye ẹkpiri erilatajeru  
 ụlo iya iphe-ẹhuka.  
 Obenu l'onye kpọru  
 ẹka-azụ ashị;  
 bẹ ndzụ e-dzu.
- 28 Onye doberu ẹka ndoo  
 arị-jeodu iphe oo-kfu arịri.  
 Obenu l'ẹjo madzụ;  
 bụ ẹjo okfu eshije iya l'ọnu.
- 29 Ndu ẹjo madzụ;

- bẹ Ojejoje anoje ote-anya.  
 O bu l'oonuje iphe ndu  
 doberu eka ndoo ekfu anu iya.
- 30 Ifu-ochi emeje t'ehu tso madzu ena;  
 nzi oma l'eshije madzu uri jeye l'okpu.
- 31 Onye ngaberu nchi le mba,  
 anu ndzu, a baru iya;  
 be yele ndu maru iphe  
 e-mekochaa nodu l'okpoku lanu.
- 32 Onye e-te nwedu iphe  
 o guberu ahuhuhù, aahù iya;  
 bu ashì b'ò dù onwiya.  
 Obenu l'onye a hù ahuhuhù;  
 yo nua ya bu onye nweru egomunggo.
- 33 Otsu Ojejoje egvu ezije  
 madzu mmamiphe;  
 odo aburu l'i -wozita  
 onwongu ali; ugvu etso iya.

## 16

- 1 Madzu arije iphe oo-me.  
 Obenu l'ò bu Ojejoje ekfuje  
 ophu e-mekochaa mee nu.
- 2 Uche onye 'adu iya njo.  
 Obenu l'ò bu Ojejoje maru  
 iphe bu uche onye.
- 3 Woru iphe bu iphe iime  
 ememe; ye Ojejoje l'eka;  
 nggu aphu l'iphe bu iphe  
 bu idzu ngu a-nodu eme  
 l'ege i tuberu iya.
- 4 Iphe, bu iphe, Ojejoje meru;  
 b'o meru dobe t'ò gaa mkpa nk'iya;

- Ndu ẹjo iya ono b'o meru doberu mbọku,  
a-ta ẹphe aphuphu.
- <sup>5</sup> Iphe, bu onye eku onwiya  
ekuku be kwa akpamara l'ifu Ojejoje.  
Iphe ii-hube ama;  
aburu l'ẹ taa hadu ẹphe t'ẹphe laa ẹwoma.
- <sup>6</sup> Onye wozitaru onwiya ali  
l'ẹke Ojejoje no;  
l'ekfu ire-lanu;  
b'o kfujeru ugwo iphe ẹji iya.  
Yo buru ọtsu Ojejoje egvu  
emeje madzu t'o sefu ẹka l'ẹjo iphe.
- <sup>7</sup> Iphe madzu eme -duwa Ojejoje mma;  
be oomeje mee te yele  
ndu ohogu iya du le mma.
- <sup>8</sup> Nweku, e doberu ẹka ndoo kpa kakwa mma;  
ma l'ẹku, a kparu l'uzo, ẹ ta dudu mma.
- <sup>9</sup> Iphe madzu e-me b'o rije ariri dobe.  
Obenu l'ọ bu Ojejoje  
ekoshije iya ẹge ọo-hata ọkpa iya.
- <sup>10</sup> Okfu onye eze aduje l'ọ bu  
okfu, shi Nchileke l'onu;  
ọphu 'ookpeswejedu ikpe ekpeswe.
- <sup>11</sup> Iphe eegude atu ẹra iphe,  
du ẹge gbaru t'ọ du  
bu Ojejoje b'o shi l'ẹka.  
Iphe bu ẹra iphe no l'ẹkpa;  
aburu iya b'o shi l'ẹka.
- <sup>12</sup> O kwa akpamara le ndu eze meru ẹjo iphe;  
ke l'ọ bu l'odobe-ẹka-ndo;  
be onye eze egudeje mee te  
aba-eze iya nguru anguru.
- <sup>13</sup> Ire-lanu atsoje ndu eze ẹna.

- Eṗhe te gude onye ezi-okfu egvu egvu.  
 14 Eḥu -ghua eze eghughu;  
   ishi madzụ abaa ya.  
   Obenu l'ọ bụ onye maru  
   iphe abyanyije iya.  
 15 Ifu -tushihu onye eze;  
   ndzụ edzua madzụ.  
   I -laa onye eze l'obu;  
   b'ọ dụ l'ọ bụ eruru mini ọdungu.  
 16 Madzụ ọmaru mmamiphe  
   kakwa mma; mę l'onweru okpoga.  
   Iphe-odo-ęnya aka mma;  
   ma lę mkpọla-ọcha.  
 17 Uzo, ndu obu guru iphoro eshije  
   bụ uzo, buru ụba yeru iphe dụ ęji.  
   Onye afo ęke ooye okpa iya afofo;  
   bụ ndzụ iya bę ooche nche.  
 18 Madzụ -watawa oku onwiya ekuku;  
   ọ-la-l'iyi etso iya.  
   Madzụ -buwaru  
   ọ-ka-onwiya-mma-l'ęnya;  
   adada etso iya.  
 19 O ka mma l'i bụ onye  
   wozitaru onwongu ali;  
   nggu lę ndu ukpa l'ayi;  
   mę l'i tsoru ndu gude  
   oke-ępha  
   l'eke iphe ęphe nataru lę nfu.  
 20 Onye anata ntuzi-ęka;  
   bę iphe adujeru lę mma  
   onu-oma aburu k'onye  
   tukoberu Ojejoje ishi.  
 21 Onye iphe doru ęnya bụ iya;

- bụ ịe madzụ be obu ruru ali.  
 Onye olu-odoo aburu iya  
 a-du ike ozi ndu odo iphe.
- 22 Mmamiphe bu iya bu ishi  
 nggele mini ndzu l'ehu ndu nweru iya nu.  
 Obenu l'onye eswe;  
 be eswe iya ono abujeru  
 iphe eegude ahụ iya ahuhù.
- 23 Onye maru iphe aguje okfu,  
 shi iya l'onu ogu.  
 Okfu, shi iya l'onu  
 abukwanuru iphe eegude amuta iphe.
- 24 Okfu-oma du l'o bu  
 manu-engu.  
 Ooguje ehụ egugu;  
 mee t'ehu du madzụ npho.
- 25 O nweru ụzo, abuje;  
 madzụ eshi iya;  
 yo du iya l'o bu okpobe ụzo.  
 Obenu ịe mkpo-chi ishi ụzo ono bu anwuhu.
- 26 O bu iphe agu nwozi;  
 bu iya emeje; yo kabaaru oje ozi.  
 Yo buru egu, agu iya nu  
 anoduje eyeshiru iya oku.
- 27 Ejo madzụ eshibeje ite ejo iphe.  
 Ege ono be okfu, shi iya  
 l'onu anoduje ereku l'o bu ivovo-oku.
- 28 Onye elukfu anoduje akpa okfu;  
 onye ntumatu l'ebukahuje ndu  
 ephe l'iya shi du ịe mma.
- 29 Onye eme onwuu-onwuu  
 anoduje ezi ibe iya ejo nzizi;  
 l'edu iya eshi ụzo, e-ta dudu mma.

- 30 Onye aji-buru ibe iya ęnya  
 aburu ęregede bę ọogba;  
 onye ọphu kpuruberu ọnu  
 aburu ęjo iphe b'ọ tųberu k'ememe.
- 31 Ishi-ęwo bų ųgvų, dų egvu.  
 Ọ bų onye doberu ęka ndoo b'o ruje ęka.
- 32 Onye ę-ta bųdu onye  
 obu-ọku  
 kakwa mma; ma l'onye bų mkparawa.  
 Onye akpadeje onwiya teke  
 iphe egbu iya egbughu  
 aka mma mę l'onye ọphu  
 a-lų;  
 lųta mkpųkpų ọphu.
- 33 Ọ bų madzų agųje ęnwa.  
 Obenu l'ọ bų Ojejoje ekfuje onye ọo-larų.

## 17

- 1 Ọ kakwa mma l'ọ bų  
 nwęcha ọkponku bę madzų nweru;  
 l'ata iya l'ęhu-gudangu;  
 mę l'ufu ęke aagba aji;  
 ųswo l'ada iya.
- 2 Onye ozi, maru iphe bų iya  
 e-mekochaa bųru onye ishi nwata,  
 emechishi nna iya ifu.  
 Ęge ono bę nwozi ono e-tso  
 keta iphe nnajiufu iya ono;  
 l'ò -tsò bųru ųnwu iya.
- 3 Mkpọla-ọcha bų ite b'e  
 gudeje nųa ya ąnųnų.  
 Mkpọla-ododo aburu  
 ọku-ųzu;



- bẹ eegudeje data iya;  
maru m'ọ ọ́dà mma.  
Obenu l'obu madzọ bụ  
Ojejoje adataje iya.
- 4 Onye eme iphe ọ́ dọ́ ẹ́jì  
angabeje nchị l'ẹ́jọ ọ́nu.  
Ege ono bẹ onye ẹ́jìre  
angabeje nchị l'okfu,  
erekuta madzọ anụ.
- 5 Onye, achị onye ọ́kpà ọ́chì;  
kwa Nchileke, keru iya nù;  
b'ọ me iphe-iphere.  
Onye, ete ẹ́swa ẹ́ ndakfu  
dakfuru madzọ te nwedu  
iphe e-me t'onye ọ́bu laa kẹ́ manụ.
- 6 Ọ́nwu nwanwa bụ ọ́gvù,  
madzọ gude aka nka.  
Nne ẹ́ nna abụru iphe  
ọ́nwegirima gude eku onwẹ́phe.
- 7 Onye eswe te ekfukwa okfu, nweru ishi.  
Ọ́ kwaphụ ẹ́ge ono;  
b'ẹ́ tọ́ gbadu tẹ́ onye ishi dzuje ejo-ire.
- 8 Ẹ́ka-azọ́ erejeru onye,  
anụ iya nù l'ọ́ bụ ọ́gvu;  
k'ọ́phu bụ l'ọ́ nọ́duje  
agbaru iya ọ́pha-ẹ́ka.
- 9 Onye aguje nvụ l'ẹ́ke e  
mesweru iya;  
bẹ́ yẹ́le ndu ọ́do aduje ẹ́ mma.  
Obenu l'onye ta azahajẹ́du  
iphe e meru iya anọ́duje  
achịka ndu ọ́nyà iya achịka.
- 10 A -baaru onye nweru egomunggo mba;

b'ò kajẹkwa iya oru l'ẹhu;  
karia ụkporo-ọnu ẹchachi ise,  
e chiru onye eswe.

- 11 Onye eme ẹji eshibeje l'ọo nk'iya e-me.  
Obenu l'ọ bu nwozi,  
ẹ-ta phujederu madzụ imiko  
e-mekochaa hụa ya àhùhù.
- 12 Ọ kakwa mma ẹ nne agụ,  
a naru ụnwu iya furu ngu l'ụzo;  
mẹ l'i jekfuru onye eswe  
l'ẹke ọono l'eme eswe.
- 13 Onye, gude ẹjo iphe kfua  
ụgwọ iphe-ọma, e meru iya  
bẹ ẹjo iphe ta abyakwa bya  
alufu alufu ẹ nk'iya.
- 14 Ọwata ụswo dụ l'ọ bu ọswoha mini.  
Ọo ya bu t'ị haa nko;  
tẹ okfu ba ada.
- 15 Okpefu onye iswi ta dudu mma;  
mẹ ọnma onye iswi dụ mma ikpe;  
tụkokwa buru akpamara l'ifu Ojejoje.
- 16 ?Bụ uru ngunu; bẹ okpoga  
barụ l'ẹka onye eswe;  
l'ẹ-ba abụ ẹ mkpa ẹ  
egomunggo dụ iya.
- 17 Ndu eshi ọnya ekoshije  
l'ẹphe yeru onwẹphe obu tekenteke.  
Obenu ẹ nwunne bụlephu l'ògvù iphe-  
ẹhuka.
- 18 Onye egomunggo swehuru  
ewojeru onwiya ye l'itumo;  
gude naa madzụ mkpalẹka.

- 19 Onye uswo kwa ejo iphe  
 b'o yeru obu;  
 onye apali onwiya apali  
 aburu eyifu be ocho uzo iya.
- 20 Onye okpoma iya goru agogo;  
 be iphe iya anoduje ala azu azu.  
 Iphe-ehuka aburu ke onye ntuphu-ire.
- 21 Okpara-rigbarigba;  
 bu aphu tsaru nna iya;  
 eh-otso-ena ta bu ke nna,  
 nwatibe iya eme eswe.
- 22 Ehu-otso-ena kwa okpobe ogvu.  
 Obenu le meji-atofu  
 anoduje ami madu okpu  
 wongu-wongu.
- 23 Ejo madu anataje eka-azu;  
 k'ophu oo-kpe ejo ikpe.
- 24 Onye egomunggo ruru ali;  
 be amajeru iphe.  
 Obenu l'onye eswe;  
 be enya te egvueduru egvuru.
- 25 Okpara-rigbarigba;  
 bu obyaru byaru nna iya;  
 buru nggumaphu noduru nne, muru iya nu.
- 26 E to dukwa mma oreta onye  
 e-ta dudu iphe o meru nre.  
 To du mma ochi ndu  
 oke amadu iphe l'ephe meru iphe, du mma.
- 27 Onye nweru egomunggo  
 ekfuje okfu zee onu.  
 Onye eme agu aburu onye, iphe doru enya.
- 28 Oboje onye eswe -daa ashi;  
 e tubesu l'o maru iphe.

Teke bụ l'ọ taru ire iya ẹra;  
e tubesu l'ọ bụ onye iphe doru ẹnya.

## 18

- 1 Onye akpa nkinyi;  
bụ onwiya b'ọ maru.  
Ire-lanụ ataję iya ẹra lę nchi.
- 2 Onye eswe ta akpajędu ishi  
mę iphe eekfu;  
?o doru iya-a ẹnya.  
Iphe, ọ bụ bụ:  
o-kfu-nk'iya anụ-nk'iya.
- 3 Ejo iphe -vutawa ụzo;  
ndumashi etso iya.  
Iphere -byawa;  
ụzu etsoru iya.
- 4 Okfu, shi madzụ l'ọnu aduje l'ọ bụ èbò  
ẹke mmamiphe futaru;  
buru nggele, atso atso.
- 5 E tọ dukwa mma;  
tę ikpe laarụ onye ọphu meru ẹji;  
gbe nma iya onye ọphu doberu ẹka ndoo.
- 6 Ọ kwa iphe onye eswe kfutaru  
l'ọnu iya bę yele iya emeje;  
buru ọnu iya;  
bę oogudje kfuta ẹchachi.
- 7 Ọnu onye eswe bụ iya emebyije iya;  
buru ọnu iya ono abujeru ọnya; nma iya.
- 8 Okfu-azụ anọdujekwa atso ntumatu.  
Ooshije madzụ uri jeye l'ime ẹpho.
- 9 Onye, ẹ-te yeduru ẹhu l'ozu,  
ooje;  
bę yele onye emebyishi

- iphe emebyishi kwa nwunne.
- 10 Epha Ojejoje bu  
 ọkpo-mgbinyiku ọlo-eli;  
 ẹke ndu doberu ẹka ndoo agbabajẹ;  
 je ezeeru ndzụ edzua;
- 11 Eku onye nweru iphe aduje  
 iya l'ọ bu agbarike iya.  
 Ooduje iya l'ọ bu eze  
 ụpho-mkpuma, o gude egbochita onwiya.
- 12 Madzụ -bụwaru  
 ọ-ka-onwiya-mma-l'ẹnya;  
 adada iya etso iya.  
 Obenu ẹ madzụ wozita  
 onwiya alị; ugvu etso iya.
- 13 Onye ẹ-ta nūdua iphe eekfu; je eye iya ọnu  
 b'ọ bu iya ririri; bụru iya iphe-iphere.
- 14 O bu obu onye esedeje ndzụ iya  
 teke iphe eme iya.  
 Obenu l'obu -kofuwa madzụ;  
 bẹ nk'iya gvụakwaru.
- 15 Onye nweru egomunngo  
 bu iya bẹ iphe eeje akajẹ odo ẹnya;  
 bụru iya akajẹ ogebe nchi  
 t'iphe kabaa ya ru odo ẹnya.
- 16 Iphe-oma asajeru onye eme iya nu ụzo;  
 l'ifu ndu oke madzụ.
- 17 Oobuje onye lanu -doo;  
 ẹba atsukfuru;  
 gbururu jeye onye k'ẹbo abya eyee ọnu.
- 18 A -gụa ẹnwa l'iphe ada okfu; okfu alaa;  
 e shi ẹge ono gboo ndu ese alakahu.
- 19 Oro-buta nwunne ngu,  
 i mesweru kakwa ẹhuka;

- mẹ l'ọluta mkpukpu,  
gude mgbodo gbabuta  
onwiya mgburumgburu.
- 20 Ọ bụ okfu, shi madzụ l'ọnu;  
bẹ oogudeje kfutaru onwiya  
iphe e-ji iya ẹpho;  
bụru iphe shi iya l'ọnu;  
bẹ oogudeje kpajia okfuru.
- 21 Ndzụ l'ọnwu kwa l'ọnu b'o shi.  
Ọo ya bụ l'onyenọnu  
a-kwakọbe nata iphe,  
o kfutaru l'ọnu iya.
- 22 Onye chọ-vuru nwanyi,  
ọo-lụ;  
chọ-vukwaru iphe dọ mma.  
Onye ono atubaje Ojejoje l'obu.
- 23 Onye ụkpa anọduje arọ arọro;  
Obenu l'onye nweru iphe egudeje olu-ike.
- 24 Onye igwe-ọnyà awakwa ọgu.  
Obenu l'o nwekwaru ọnyà,  
akajẹ ọno ntse;  
karia nwunne.

## 19

- 1 Ọ kakwa mma ọ bụ  
onye ụkpa, ụta ẹ-ta dudu l'ẹhu iya;  
mẹ l'onye eswe,  
ẹ te gudedu ire iya ẹka.
- 2 Ẹ tọ dukwa mma lẹ madzụ;  
b'o vu evuvu;  
mbụ iphe ẹ tọ madụ ishi iya.  
Onye kọrokoro-mẹremere  
eshiswekwa ọzo.

- 3 Eswe, madzụ eme emebyijeru iya iphe.  
Teke ono; yọ ghakọbe; bobbe iya Ojejoje.
- 4 Ẹku ezetaje igwe ònyà;  
obenu l'ụkpa anọduje  
achịka ndu ònyà achịka.
- 5 Onye ejọ ekebe ta alakwa kẹ manụ;  
ọphu onye ejọ-ire ta byakwa bya anahụ.
- 6 Aaduje l'igwe achọ t'onye  
eme úkò meeru ẹphe úkò.  
Ege ono bẹ onyemonye  
ọbule abụjeru ònyà onye asa ẹka.
- 7 Onye ụkpa aduje ndu yẹle iya bụ ashị.  
?Buchia ndu yẹle iya eshi  
ònyà ta anọdu agbaru iya ọso.  
Ọonoduje agbatso ẹphe;  
to nwe onye agharu iya ẹnya.
- 8 Ọ bụ onye maru iphe eyejeru onwiya obu;  
bụru onye ẹnya eru alị;  
b'ọ dọjeru lẹ mma.
- 9 Onye ejọ ekebe ta alakwa kẹ manụ.  
Ege ono bẹ onye ejọ-ire  
a-buru ọ-la-l'iyi.
- 10 Ẹ tọ gbakwa t'onye eswe riye ugvu;  
k'ọphu ọ bụru t'ohu bụru  
onye ishi ụnwu eze.
- 11 Ọ kwa iphe-odo-ẹnya emeje  
tẹ madzụ ba abụ onye  
obu-ọku;  
bụru iya ugvu teke e meru iya eji.
- 12 Iwe eze adujekwa l'ọ bụ ẹke agụ ede ekiri.  
Obenu lẹ madzụ -bawa iya  
l'obu bẹ ọduje l'ọ bụ ẹke iji dashiru.
- 13 Ọkpara-rigbarigba; bụ ụsu; sụ nna iya;

- nwanyi okfu-ọnu adu l'ọ bu  
nwa teyiteyi mini tekenteke.
- 14 Ulo; me eku nwoke;  
bu unwu iya enweje iya.  
Obenu l'okpoberu nwanyi;  
bu Ojejoje anuje iya.
- 15 Enyiru atujeru madzu ye le mgbenya;  
buru onye no ke manu azeje egu.
- 16 Onye eme iphe ekemu kfuru  
kwa ndzu iya b'o che.  
Obenu l'onye aalo eka le nchi;  
to nwe iphe o guberu iya  
achokwaru onwiya  
ishi-ephuhu.
- 17 Onye asa eka l'anu ndu ukpa  
iphe kwa Ojejoje be ooje ugwo.  
O bu Ojejoje e-bu iya nggo.
- 18 Huje nwatibe ngu ahuhu teke ii-huta iya.  
Ole ba ahukwa iya ke ahugbu.
- 19 Onye okpoma-oku;  
be okpoma-oku iya  
e-butajekwa;  
ke li -dzo ya l'owaa;  
be ii-dzoje nu iya phu l'odo.
- 20 Ngabeje nchi teke  
aakpo-ziru ngu uzo;  
nggu angabeje nchi l'iphe, eezi ngu;  
k'ophu ii-mekochaa buru onye maru iphe.
- 21 Iphe, no madzu l'obu  
k'ememe ahaje l'igwe.  
Obenu le ke Ojejoje mefutaje.
- 22 Iphe eele madzu enya l'eka  
bu owozita onwonye ali.



- O kakwa mma lẹ madzụ  
 bụ onye ụkpa; mę l'ọ bụru onye ẹjo-ire.
- 23 Otsu Ojejoje egvu emejekwa tẹ madzụ kaa nka.  
 Teke ono; obu erua onye ọbu alị;  
 iphe-ẹhuka eburu ụba yeru iya.
- 24 Onye enyiru;  
 bẹ ẹka iya akwajẹ l'efere;  
 tọo dūhe ike palia ya ye l'ọnu.
- 25 I -chia onye uru-ọnu iphe;  
 onye ẹ-ta mafudu iphe  
 egude iya mụta iphe.  
 Onye iphe doru ẹnya abuje:  
 ị -baaru iya mba;  
 yo gude iya kabaa ọmuta iphe.
- 26 Onye etsuje nna iya iphe; chifu nne iya  
 bụkwa iphe-iphere;  
 bụru iphe-ọchi.
- 27 Nwa mu; ị -haa ọngabe nchị  
 l'iphe eezi ngu;  
 bẹ ii-phukwa ụzo lẹ k'iphe odo-ẹnya.
- 28 Ejo ekebe anmajẹ ewotaje ikpe,  
 vudo nhamunha nmaa swọkoswoko.  
 Onu ejo madzụ aburu ejo  
 iphe bẹ ọonoduje eri ori nri.
- 29 Ndu uru-ọnu; b'e kpewaru  
 ikpe ẹphe; dobe edobe;  
 ẹchachi anọduwa l'eche ndu eme eswe.

## 20

- 1 Onye anguruma  
 bụ iphe-iphere b'ọ bụ;  
 bụru onye ụswo.  
 Onye nguru mę;

- nguta iya k'ome l'anya ta makwa iphe.
- <sup>2</sup> Iwe eze adujekwa l'ọ bu ẹke agụ ede ekiri;  
k'onye ọphu, kpatsuru iya  
iwe ọbu agvụakwanua.
- <sup>3</sup> Onye agbaru okfu ọso;  
kwa ùgvù b'ọ kwabe onwiya.  
Ọ bu onye eswe  
akwagebeje akwagebe uswo.
- <sup>4</sup> Onye ẹniruru ta akojedu okfu  
teke ibe iya akọ.  
O -rua teke aakpata iphe akpata;  
yo lelaha taphungu.
- <sup>5</sup> Iphe madzụ ariẹbe hakwa ogvu l'ọ bu ebo.  
Ọ kwa onye iphe doru ẹnya atsutaje iya.
- <sup>6</sup> Ndiphe aduje l'igwe ajishi ire l'ephe eme  
ọhuma.  
Ọlobu; ?bu onye b'a maru, e gude ire iya ẹka.
- <sup>7</sup> Onye doberu ẹka ndoo;  
be uta ta adujedu l'iphe,  
bu iphe, oome ememe.  
Ọ -nọtsua laa; ọnu-oma aburu k'unwu iya.
- <sup>8</sup> Onye eze -nọdu l'aba-eze iya l'ekpe ikpe;  
b'o gudeje ẹnya yofu  
ezi-okfu l'ẹjo-ire.
- <sup>9</sup> ?Bu onye a-sụ ẹ ya mewaru;  
obu agụ ya iphoro;  
tọ dūhe ẹjo iphe, nọ iya l'ẹhu?
- <sup>10</sup> Ogude iphe, ẹ-ta bụdu  
ọkpobe iya tūa ẹra iphe;  
mẹ ogude iphe, ẹ-ta bụdu  
ọkpobe iya mata iphe amata  
tūkokwa buri akpamara l'ifu Ojejoje.
- <sup>11</sup> Ọ bu umere nwata atuje ọnu iya;

- ?m'ò bụ òkpobe nwata;  
 ?tò mkpòkoro nwata.
- 12 Nchị, anụ iphe yèlè ẹnà, aphụ ụzọ  
 bụ Ojejoje tuko iya mekota.
- 13 Be ekunukajekwa mgbènyà.  
 Ọdumeka bẹ ii-bụkwa ụkpa-mkpèrè.  
 Mụjeru ẹnà; ẹge ii-nweru  
 nri nweru iya k'etsutsu iya.
- 14 Onye azụ iphe asuje l'iphe  
 ya azụ renukaru ire.  
 Obenu l'ò -lụfulephu;  
 yo gude iphe ọbu,  
 ọ zuru ọbu kulahaa onwiya.
- 15 Mkpòla-ododo nọ;  
 mkpuma oke aswa akuru.  
 Obenu; l'ọnu, ekfu okfu,  
 ekoshi mmamiphe dukwa ụko.
- 16 Madzụ -naa  
 o-shi-awe-o-shi-awe mkpalẹka;  
 natakwa iya uwe eli ẹhu iya.  
 Gude iya t'ò ye iphe l'itumo;  
 m'ò -bụru onye mba ọdo  
 b'ò naru mkpalẹka ọbu.
- 17 Nri, a kpataru l'ugho atsoje ẹnà teke eeri iya.  
 Obenu; l'e -megee;  
 bẹ ọnu abụjeru onye riru iya nụ ẹja ẹja.
- 18 I -chị idzu iphe ii-me; kpajèedu ishi.  
 Ọ -bụru l'ì bya oje ọgu;  
 kpatajè-odu ishi t'e koshi ngu ẹge ii-me iya.
- 19 Kfuru mu; be ekfuru onye ọdo;  
 ta bụkwa k'onye ntumatu.  
 Ọo ya bụ t'ì bukwaru ụba yeru ekfurekfu.
- 20 Onye kọru nna iya;

- m'ò bụ nne iya ọnu  
 bẹ aa-phụ-nyị urọku iya l'echi-abalị-ìshì.
- 21 Ẹku, e te tsudu ẹphuru kpata  
 ta abujekwaru onye kparu iya nụ  
 iphe-oma l'ikperazu iya.
- 22 Ba asukwa: "L'ii-kfu madzu  
 ugwo ejo iphe, o meru ngu."  
 Hakwaa te Ojejoje gbaaru ngu odzori.
- 23 Ogude iphe, e-ta budu  
 okpobe iya tua era iphe;  
 me ogude iphe, e-ta budu  
 okpobe iya mata iphe amata  
 tukokwa buru akpamara l'ifu Ojejoje
- 24 Keshinu ophu o bu Ojejoje  
 atojeru madzu uzo;  
 ?nanu ege madzu e-me makotaru  
 iphe amubebe l'ehu iya.
- 25 O kwa ogbaru onwonye onya;  
 mbu madzu ogude ovovoshi  
 kwe Ojejoje ukwa iphe;  
 le b'o ri iya ariri;  
 k'ophu e to wodu iya.
- 26 Onye eze, maru iphe afoje  
 mkpukpu iya l'o bu onye afo ereshi;  
 bya egude iphe eegudeje  
 etsu witu foshia ya ndu k'ejo iya ono.
- 27 Obu madzu bu iya bu urọku Ojejoje,  
 oogudeje atu ehu madzu yoriyori.
- 28 Onye eze, yeru ndu ochi obu;  
 bya aburu onye ephe gude  
 ire iya aka; te nwedu iphe,  
 iphe-ehuka, byaru iya nu eme iya.  
 Yo buru n-yemobu emeje;

- te ọchichi iya ba anga anganga.  
 29 O bu ugu; bu ike ke  
     unwu-okoroḅya.  
 Ishi-ewo aburu mma ke ndu bu ọgurennya.  
 30 Eka, e chiru madzụ;  
     chifu iya ọnya be eegudeje gọta iya;  
     t'o sefu eka l'ẹjo iphe;  
     buru echachi be eegudeje  
     dozia madzụ ime ẹhu.

## 21

- 1 O bu ege Ojejoje anọduje  
     atuzi eke nggele a-tsọ laa;  
     bu ege ọonoduje atuzi ọkpoma onye eze.  
 2 Uche onye 'adụ iya njo.  
     Obenu l'ọ bu Ojejoje maru  
     iphe bu uche onye.  
 3 Iphe dū mma; daburu adaburu;  
     be Ojejoje kakwa anata;  
     me le ngweja.  
 4 O-ka-onwonye-mma-l'anya;  
     me eza, ndu ẹjo madzụ ese  
     tukokwa buru iphe dū ẹji l'ifu Nchileke.  
 5 Iphe onye, nweru ọriri ziru  
     obu alị rịa; mee;  
     abujekwaru iya uru.  
     Ege onokwaphụ;  
     be ọchi iphe ọku; mee atuje madzụ ụkpa.  
 6 Eku, a dzutaru l'ẹjo-ire  
     ephukashihujekwa l'ọ bu udzu ite.  
     Ege onokwaphụ b'ọ bu ọnya,  
     egbu madzụ l'ophọku.  
 7 O bu ẹhuka ẹhuka ke ndu ẹjo iya ono;

- bụ iya bụ iphe e-kpofu ẹphe ekpofu;  
 ke l'ẹphe jikaru ome iphe nhamunha.
- 8 Ndu ẹjo iya ono; te mejekwa iphe nhamunha.  
 Obenu l'iphe onye eme ọhuma;  
 be iphe oome adukotaje nhamunha.
- 9 Ọ kakwa mma l'i bu l'azu-utsulo;  
 me le nggu le nwanyi okfu-onu bu.
- 10 Onye eme iphe du ẹji;  
 be ome iphe du ẹji evuje evuvu;  
 Ọphu imiko madzu ibe iya 'adudu iya.
- 11 A -hùà onye uru-onu àhùhù;  
 'o-nwe-egomunggo egude iya kwaa ẹnya;  
 A -kpọ-ziaru onye maru iphe ọzo;  
 yọ kabaa amama.
- 12 Onye doberu ẹka ndoo  
 atufuje ẹnya ele iphe amu  
 l'ulo ndu eme iphe du ẹji;  
 Mbụ; kpurupyata, ndu ẹjo iya ono l'ẹphe ha.
- 13 Onye tsuchiru nchi t'ẹ b'ọ nu  
 mkpu onye ukpa echi;  
 be e-chinua nk'iya ujiku lanu;  
 ọphu odudu onye anu iya nu.
- 14 Iphe-oma, e meru l'edomi  
 adanyijekwa ẹhu-eghughu.  
 Ẹka-azu, a reru madzu  
 l'uwe iya abyanyije oke ẹhu-eghughu.
- 15 E -kpee ikpe, du maa;  
 be ndu doberu ẹka ndoo etejekwa ẹswa.  
 Obenu le ndu ẹjo iya ono; be ẹhu adaje kọo.
- 16 Onye lufuru l'okpa egomunggo;  
 be tsokwaa le ndu maa.
- 17 O-ri-l'ago abujeru onye ukpa.  
 Ege ono be onye yeru mee;

- mẹ o-ri-l'ọnu obu;  
te enwejedu iphe.
- 18 Ndu iphe dụ ẹji l'alajẹ l'ọchi  
ndu doberu ẹka ndoo.  
Ege ono bẹ ndu ẹ te gudedu  
ire ẹphe ẹka ala lẹ kẹ ndu obu guru iphoro.
- 19 Ọ kakwa mma t'ì kwata je eburu l'echi-ẹgu  
mẹ l'ọlu nwanyi, nweru ẹjo ọkpoma;  
bya aswọnuka uswo.
- 20 Ụlo onye maru iphe;  
bẹ nri, eeri eriri l'udu iya l'udu iya;  
mẹ manụ akujeru akuru.  
Obenu l'onye eswe erigbuje iphe o nweru.
- 21 Onye achị nta  
odobe-ẹka-ndoo  
yẹle nta n-yemobu achitaje ndzụ.  
Onye ono; bẹ aa-nọdu  
akwabẹ ugvu; ẹku aburu nk'iya.
- 22 Onye maru iphe;  
bẹ etsogheje mkpukpu  
ndu ndaji-nggara ọgu;  
nwukposhia  
ọkpo-mgbinyiku ụpho-mkpuma  
mkpukpu ẹphe, ẹphe keru ike yeru.
- 23 Onye eche ọnu iya nche; bọru onye ata ire iya  
era  
bẹ ezejeru iphe-emeka.
- 24 Onye eku onwiya ekuku;  
bọru  
ọ-ka-onwiya-mma-l'ẹnya;  
bẹ bụ ọru-ọnu bụ ẹpha iya.  
Onye ono bụ ịyangga kpụu.
- 25 Onye ẹnyiru bụ ẹkpiri egbuje iya;

- ke l'ọ chiru ẹka wushi;  
 jika o je ozi.
- 26 Eswe l'enyashi;  
 be ọonoduje agu iya  
 te ya nweru ọwaa;  
 nweru ọwaa.  
 Obenu l'onye doberu ẹka  
 ndoo te elejedu ẹnya l'iphe ọonu madzu.
- 27 Ngweja, ẹjo madzu achi;  
 bu akpamara l'ifu Nchileke;  
 ọphu ọ buru k'onye gude  
 ẹjo oriri bya iya egwogwo.
- 28 Onye ẹjo ekebe;  
 be ọnu a-buru kpurukudungu.  
 Obenu l'onye egejeodu nchi;  
 ọmanu yo yede ọnu;  
 be okfu, o kfuru a-ọ jeyewaru.
- 29 Ejo madzu emeje t'a su.  
 Obenu l'onye obu guru iphoro  
 arije iphe oome ariri.
- 30 E to nwedu mmamiphe;  
 m'ọ bu iphe-odo-ẹnya;  
 m'ọ kwanu idzu,  
 ee-gudeghe mebata Ojejoje.
- 31 Iphe e meru inya kwaberu bu ke ọgu.  
 Obenu l'ọ bu Ojejoje emeje t'e mekputa l'ọgu.

## 22

- 1 Ọkpobe ẹpha kakwa oke ẹku.  
 Ugvu aka mkpọla-ọcha;  
 me mkpọla-ododo.
- 2 ?Bu ngunu jikoru onye  
 nweru iphe; me onye ukpa.



- Ọ bụ Ojejoje keru ẹphe ẹbo.  
<sup>3</sup> Onye nweru egomunggo  
 aphuje iphe-emeka;  
 zeeru iya.  
 Obenu l'onye egomunggo  
 swehuru ejeje  
 dukpudukpuu  
 je adalahu l'iphe-ehuka.  
<sup>4</sup> Obunggo, etsoje onye du agu;  
 l'atsụ Ojejoje egvu bụ  
 iphe-enweru; ugvu; me nka.  
<sup>5</sup> Iphe no l'uzo ẹjo madzu bụ  
 ọgvú; me ọnyà.  
 Obenu l'onye eche ndzu iya  
 nche ebujeru uba yeru iphe ono.  
<sup>6</sup> Zufuta nwata l'uzo, oo-shi;  
 o -vufutalephu; to hadu iya.  
<sup>7</sup> Onye ukpa bụ ohu onye nweru iphe.  
 Onye ji ugwo aburu ohu, onye ooji ugwo.  
<sup>8</sup> Onye wotaru ẹjo ikpe dzabe  
 l'ọ bụ oshi kwa iphe-ehuka;  
 be ọo-wota;  
 egvu, aatsụ iya alaa.  
<sup>9</sup> Onu-oma bụ k'onye bụ  
 o-me-l'uko;  
 kele ookejeru ndu ukpa nri iya.  
<sup>10</sup> A -chifu onye uru-onu;  
 okfu alaa;  
 uswo; me oko-onu agvu.  
<sup>11</sup> Ọ bụ onye obu guru iphoro;  
 okfu iya adu belebele; e-shitaghe eze onya.  
<sup>12</sup> Ojejoje arubeje enya le mmamiphe.  
 Obenu l'okfu onye ẹ te gudedu

- ire iya ẹka;  
 bẹ oomeje t'ẹ b'ọ dụ iphe ọo-bu.
- 13 Onye ẹnйiru asuje:  
 “L'agụ nọkwa l'etezi.  
 Lẹ ya -lufu;  
 bẹ ọo-tagbukwa iya l'esu-uzo.”
- 14 Onu nwanyi, eri ogori kwa iduma b'ọ bu;  
 Onye, a-dalahu iya nu;  
 kwa onye kpatsuru Ojejoje iwe.
- 15 Umere unwegirima;  
 bu umere unwegirima.  
 Obenu l'oo echachi,  
 bẹ eegudeje huzita iya.
- 16 Onye adzo ndu ukpa okpa l'ishi;  
 k'ophu ya a-ka onweru  
 iphe; me onye, bu ndu  
 nweru iphe; bẹ onuje iphe;  
 e-mekochakwaa buru onye ukpa.

*Ukporo akpuru okfu l'iri,  
 shi l'onu ndu maru iphe*

- 17 Ngabe nchi; nua okfu onye maru iphe;  
 nggu ezia obu l'iphe mu ezi ngu.
- 18 Ke l'oo-duru ngu le mma;  
 m'i woru iya ye l'okpoma;  
 chiru iya l'eka tekenteke;
- 19 k'ophu obu ngu a-no l'eke Ojejoje no;  
 Mu meekwaru t'o doo ngu  
 enya ntanu; nggubedua l'onwongu.
- 20 Mu deekwaru ukporo etu  
 l'etu iri doberu ngu.  
 Etu ono bu etu, a-nodu alo  
 ngu ẹka le nchi;

- l'ezi ngu mmamiphe.
- 21 O bu ẹtu, a-nọdu ezi ngu  
 iphe bu ire-lanu;  
 buru ẹtu, ii-dakobe;  
 k'ophu ịi-maru iphe ịi-nọdu  
 edoru onye ziru ngu nụ.
- 22 Be egudekwa kẹ lẹ madzu  
 bu onye ukpa; naa ya iphe o nweru.  
 Ophu iimejekwa t'anya  
 nyihu onye ẹ te nwedu  
 ẹge o haru iya l'ulo-ikpe;
- 23 kẹle Ojejoje  
 e-mekochakwa-a  
 gbaaru ẹphe ọdzori;  
 nalata ndu ono ugwo iphe ono,  
 ẹphe naru ẹphe ono.
- 24 Tẹ nggu l'onye obu-ọku;  
 be eshikwa ọnyà;  
 ọphu nggu l'onye  
 ẹhu-ọnwuu 'ejekwa ayiyi;
- 25 e menyaa; yo chia ngu umere iya ono;  
 nggu eshi ẹge ono baa l'enu, ẹ ti tudu.
- 26 Ba anajekwa madzu mkpalẹka;  
 ọphu ịinodukwaru madzu l'itumo;
- 27 kẹ l'i -nwedu iphe ii-gude kfua ya;  
 bẹ aa-pakwa paa paa  
 oshi-azẹe ngu.
- 28 Ba afofukwa ẹkpè,  
 e gude kpa a oke-alị l'oge ndiche.
- 29 ?Ị phuru onye ọru iya doru ẹnya ọhuma.  
 O bu onye ono bu onye  
 e-jegheru ndu eze ozi.  
 E too jegheduru ndu ẹ ta

madu ẹpha ẹphe ozi.

## 23

- 1 Nggụ l'oke amadụ l'eri nri;  
tọkwaa ẹhu; maru egbe onye ọbu.
- 2 Nggụ akpade onwongu;  
m'ọ -buru l'ì bụ onye  
oke-ẹpho.
- 3 T'ẹhu-anmanma nri ọbu;  
be egudekwa ngu;  
kẹ l'ọ kwa nri,  
e gude eme t'a hata ngu l'ọnya.
- 4 Be esegbushikwa onwongu l'akanya.  
Kwakwaa ẹnya;  
nggu ejetaje ghaa ẹnya;
- 5 kẹ l'ẹku abujekwa:  
a -bya aji ẹnya;  
b'ọ buwa phuchangu;  
fua ẹbà l'ọ bụ ugo; phekashihu.
- 6 Onye ụkparaswi -kua ngu lẹ nri; be ejekwa;  
ọphu nri, o shiru 'agujekwa ngu;
- 7 kẹ l'egbe onye ono;  
bẹ iphe ọoriye bụ l'ì byaru iya erigbu.  
Ọo-nọdu ekfukwaru ngu-a t'ì rifua;  
obenu lẹ nri, ooseru ngu te shidu iya l'obu.
- 8 Nwa iya ọphu bahuru ngu l'ọnu;  
bẹ ịi-gbọkwa.  
Ẹpha, i turu iya aburu ngu kẹ mmanu.
- 9 Be ekfujekwa okfu yeru onye eswe;  
kẹ l'oo-wotakwa okfu mmamiphe ono,  
i kfuru iya ono wụa lẹ ntụ.
- 10 Ba afọfukwa ẹkpè, e gude  
kpaa oke-alì l'oge ndiche;

- ọphu ịi-bajekwa l'alị ndu a tọru ogbe;  
 11 kele Ojejoje, bu ike kpụu  
 a-byakwaru ephe ọdzori.  
 Oo-gbakwaru ephe ọdzori;  
 gbagude ngu.
- 12 Yejekwaru ẹhu l'iphe eezi ngu;  
 nggu angabeje nchị l'okfu, ezi mmamiphe.
- 13 Ba apajekwa nwata  
 mini-ishi-ọba.  
 Chije iya iphe; l'ẹ-tọ nwuhukwa.
- 14 I -gude ẹchachi hụa ya àhùhù;  
 nggu adzọo ya ndzu.
- 15 Nwa mu; iphe e-me t'ẹhu tsọo mu ẹna;  
 kwa l'ị bu onye maru iphe.
- 16 Mbụ l'obu a-nọdu atsọ mu ẹna;  
 m'ọ -buru l'okfu, shi ngu  
 l'ọnu adabujeru adaburu.
- 17 Be ejijekwaru ndu ẹjo madzụ ijimẹnya.  
 Tẹ iphe ii-mejechia buru  
 t'ị tsuje Ojejoje egvu.
- 18 Ono iphe e-me t'uzo ifu ngu duru ngu lẹ mma;  
 ọphu iphe ono, iile ẹnya iya  
 ono 'aladụ kẹ mmanu.
- 19 Ngabẹ nchị nwa mu; maru iphe;  
 tẹ obu ngu nọdujekwa l'egbe ndzụ, iibu.
- 20 Be etsokwa ndu anguruma;  
 ọphu i tsokwa ndu ẹkpiri anụ;
- 21 kele ndu anguruma;  
 mẹ ndu ẹkpiri akpajekwa ukpa.  
 Onye aze-phe ngwọrinaka  
 aburu nkaraba ẹkwa;  
 bẹ oo-mekochaa wee.
- 22 Nujekwaru nna, mụru ngu nụ okfu;

ọphu ìkpojekwa nne ngu ẹbo-ẹbo-l'afu;  
okfu l'ọ kahụwaru.

- 23 Zuta ire-lanu;  
nggu azuta mmamiphe!  
Be erekwa iya erere!  
Buru onye hùrù onwiya àhùhù;  
nggu enweru egomunggo.
- 24 Nna onye doberu-ẹka ndoo;  
bẹ ẹhu atsoje ẹna nshinu.  
Nwa, maru iphe;  
aburu ugvu nụ nna iya.
- 25 Mejekwa t'ẹhu tsọ nna lẹ nne ngu ẹna.  
Nnggu emee tẹ nne,  
muru ngu nụ  
teje ẹswa l'okfu-ẹhu ngu!
- 26 Nwa mu; tẹ obu ngu nọdu l'ẹke mu nọ.  
Enya erua ngu alị l'umere mu;
- 27 kele nwanyi okpara bukwa iduma.  
Nwanyi, eme ẹji aburu  
welu, dụ kpagungu.
- 28 Ọ bụ ẹge abali-d'egvu anọduje l'egbudu;  
kwaberu madzụ; bụ ẹge ọ nọduje.  
Iphe ọ nọ l'ọzo iya aburu  
t'ọ rata unwoke ndu achi  
nwanyi t'ẹphe ka l'igwe.
- 29 ?Bụ onye bụ onye a turu ọnu?  
?Bụ onye bẹ aphụ jiru okpoma?  
?Bụ onye bụ onye nseku?  
?Bụ onye bụ onye edo?  
?Bụ onye bụ onye ukparehu?  
?Bụ onye bẹ ẹnya eke mee mee?
- 30 Ọ bụ ndu t'ẹ b'ọ phodu l'ite;

- ndu etsojeru l'achọ mee,  
a gwaru agwagwa.
- 31 Wofu ẹnya lẹ mee teke ọotsu vaa vaa;  
l'atsutsu atsutsu l'okoro;  
mẹ teke o deru ederu.
- 32 E -megee; bẹ ọotajekwa l'ọ bụ agwọ;  
ẹhuka iya adu l'ọ bụ ẹra ogiji.
- 33 Teke ono; nggu awata ọphu  
iphe ẹ tii phujehadua;  
wata ọri iphe gbachiru ẹnya.
- 34 Teke ono; yọ du ngu l'ọ bụ  
onye zẹ l'echi eze ẹnnyimu;  
mbu l'ọ bụ onye degeru  
l'iphe e gvuberu l'eli  
ugbo-mini.
- 35 Nggu awata ọra:  
“L'e tsuru ngu iphe!  
Ọ bụ l'ẹphe te mekakwa mu iphe.  
Ephem tsuru ngu iphe;  
ọ bụ l'ẹ to rudu ngu l'ẹhu.  
?Bụ teke ole bẹ ii-tehu;  
je ọcho mee ọdo.”

## 24

- 1 Be ejikwaru ndu ejo madzụ ijimẹnya;  
ọphu nggu l'ẹphe 'ayikwa.
- 2 Kẹ l'iphe anoje ẹphe l'obu  
bụ iphe kpangangu.  
Iphe eshije ẹphe l'ọnu aburu  
ẹge ee-shi kpata okfu.
- 3 Ọ bụ mmamiphe;  
bẹ eegudeje akpu ulo;  
buru iphe-odo-ẹnya;

- bẹ eegudeje mee ya;  
yo shihu ike.
- 4 Ọ bụ iphe-odo-ẹnya;  
bẹ eegudeje gude ngwa-ulo, ere ire;  
l'ama mma dojia ime ulo.
- 5 Onye maru iphe kakwa onye ike nọ ike.  
Onye ẹnya ruru alị aka onye agburu-ẹhu.
- 6 Onye eje ọgu; bẹ mkpa onye nzizi dukwaru.  
Onye ọ dụ t'ọ mekputa l'ọgu;  
achọo igweligwe ndu  
a-nọdu akpọ-ziru iya ọzo.
- 7 Mmamiphe kwa ẹka 'eru onye eswe.  
Ọ -nọdu l'ẹke ọha dzuru l'obu-edukfu;  
b'ẹ to kfudu okfu.
- 8 Onye nọ l'ẹjo idzu;  
bụ iphe aa-nọdu eku iya bụ o-me-njọ.
- 9 Idzu, onye eswe chitaru  
abujekwanuru iphe dụ ẹji;  
ọphu onye ọru-ọnu  
'adujedu madzụ mma.
- 10 Ẹka -kufu ngu l'oge  
iphe-ẹhuka;  
bukwa iphe ọ bụ;  
bụ l'ị rụhuru arụhu.
- 11 Dzofutakwa ndu a kpụ eje egbugbu;  
nggu alolata ndu akpọ  
galagala ala ẹke ee-gbu ẹphe azụ.
- 12 Ị -sụ l'ẹ tọ gbasaduru ngu;  
onye ono, enyoje obu  
madzụ ono;  
?o nweru iphe ẹ tọ madụ.  
Onye ono, bụ iya eche  
ndzụ ngu ono;



?iiri l'ẹ to madu iphe iime to.  
 Oo-kfunu onyemonye  
 ọbule ọgwo l'ẹge iphe onye meru du?

13 Rije manu-ẹngu; nwa mu;

ke l'ọ du mma.  
 Mbu le manu-ẹngu,  
 e metaru l'ẹbaku-ẹngu  
 a-tsọ ngu ẹna l'onu.

14 Makwaruphu l'ọ bu

ẹge ono be mmamiphe  
 du mma le ndzu ngu;  
 I -chọ-vu iya;  
 be ọzo ifu ngu a-duru ngu le mma;  
 ọphu iphe ono, iile  
 ẹnya iya ono 'aruhudu.

15 Be ejekwa je akwaa ngge

l'ọ bu ẹjo madzu t'i je  
 egwo iphe l'ulo onye  
 doberu ẹka ndoo;  
 ọphu iijekwa ọgu  
 ọ-lua-ọlaa le nk'iya!

16 Ishi iya aburu l'onye

doberu ẹka ndoo -daa;  
 m'ọ daru ugbo ole;  
 be oo-gbeshikwa.  
 Obenu l'ẹjo madzu;  
 be ndakfu a-dakfuta.

17 Be etekwa ẹswa l'onye

ọhogu ngu daru;  
 ọphu ẹhu atsojekwa ngu  
 ẹna l'ukfu kpọru onye ọhogu ngu;

18 k'ọphu ẹ to ghudu Ojejoje eghughu;

yọ haa ya ome iphe ọ ga eme iya.

- 19 T'iphe ndu ejo iya ono eme;  
 be emejekwa t'èhu wata ngu  
 óphù àphùphù;  
 òphu ejijekwaru ndu  
 ejo madzù ijimènya.
- 20 Kẹ l'ẹjo madzù;  
 te nwedu iphe oo-le ẹnya iya.  
 Oku a-nyìhuru iya;  
 yọ wùshi ọwa.
- 21 Nwa mu; tsujekwa Ojejoje egvu;  
 nggu atsujekwaphu onye eze egvu.  
 Be etsokwa ndu ekwefuru ẹphe íkè;
- 22 kẹle Ojejoje yẹle onye eze  
 ono bẹ e-mekwa tẹ  
 kpurupyata tų ngu  
 ọtu-l'ụkfu;  
 ?Bụ onye maru egbe  
 ọdachi, ẹphe e-gude dakfu ngu.
- 23 Ndu ọwaa bụkwaphu okfu onye mmamiphe:  
 Ole madzù ẹnya l'ifu  
 l'ekpe ikpe ta dụkwa mma.
- 24 Mbụ l'onye sụru onye  
 ikpe nmaru l'ọo ya bẹ iswi dụ mma  
 bẹ ndiphe e-gudekwa nmaa ẹjo ẹtu;  
 iphe bụ mbakeshi avụaru iya pyìi.
- 25 Obenu lẹ ndu ikpe;  
 nma iya onye ọ nmaru;  
 bẹ iphe a-dụru lẹ mma;  
 Ndu ono bẹ aa-gọru  
 ọnu-ọma, ha nshinu nụ.
- 26 Onye yeru ọnu l'okfu ẹge  
 gbaru nụ ekoshi lẹ ya bụ ọkpobe ọnya ngu.

- 27 Vuru ụzo jeodu ozi,  
     nọru ngu nụ l'ali;  
     tẹmanu nggu ejee ozi,  
     nọru ngu l'egu;  
     tẹmanu nggu awata ọkpụ ụlo ngu.
- 28 Ba agbakwaru madzụ ibe ngu ẹjo ekebe;  
     ọphu i gudekwa ọnu ngu duphua madzụ.
- 29 Ba asukwa l'ii-melata  
     madzụ iphe o meru ngu;  
     gude kfuà madzụ ụgwo iphe o meru.
- 30 Mu swejeru ẹke onye ẹnyiru kọru okfu;  
     je aghajaa ẹke onye  
     ẹ-te nwedu egomunggo kọru vayinu.
- 31 Iphe furu l'ẹke ono abụru ọgarama-mbo.  
     Eke ono abụkotaru ẹgbudu.  
     Mkpuma, e gude  
     gbaa ya ụpho; adakashihuhwa.
- 32 Mu abya awata ọri iphe ono, mu phuru ono;  
     bya egude iya mụta iphe.
- 33 L'ọ kwa: mgbenya -rota ngu;  
     nggu asụ l'ọo t'i ekutota iya nwanshi.  
     Nnggu achiru ẹka ye  
     l'utakfu; l'ọo t'i tuta ume.
- 34 I -bya ele ẹnya; ụkpa afuaru ngu l'ọ bụ onye  
     onye abali-d'egvu byaru nk'iya;  
     ụkpa atụ ngu gbirimu l'ọ bụ onye  
     onye iphura, chi ngwa-ọgu byakfutaru.

## 25

### *Etu ọdo, Sólomọnu nmashiru.*

- 1 Ndu ọwaa; kwaphu ẹtu ẹtu ọdo,  
     Sólomọnu nmashiru.

- Ndu deru iya l'èkwo bu ndibe Hezekáya,  
 bu eze ndu Júda.
- <sup>2</sup> Odomi iphe edomi abujeru Nchileke ugvu.  
 Obenu l'ovo iphe avovo  
 bu ugvu ke ndu eze.
- <sup>3</sup> O bu ege igwe habe l'eli;  
 ali adu-be ogvu;  
 bu ege obu onye eze  
 bu-be iphe e taa vo-rudu avo-ru.
- <sup>4</sup> Kweshia egba, gbaru le mkpola-ocha;  
 onye uzu enweru iphe  
 oo-gude kpua  
 mkpola-ocha, ama mma.
- <sup>5</sup> Rushia ndu ejo iya ono l'ehu  
 eze; nggu aphu; aba-eze iya  
 egude odobe-eka-ndoo nguru anguru.
- <sup>6</sup> Ba anodukwa l'ifu onye eze atu-li onwongu!  
 Ophu i jekwa asugaru l'eke  
 ndu oke amadu no!
- <sup>7</sup> O kakwa mma t'o buru  
 yebedua e-gbe su ngu:  
 "Gbeshi; bya anodu l'eke owaa, ka mma;"  
 me l'i gbe je anodu l'eke du mma;  
 a su ngu t'i lufuta je anodu  
 l'eke e-ta dudu mma;  
 nggu emewaphu onwongu  
 iphe-iphere l'ifu oke amadu ono.
- <sup>8</sup> Ba agbakebejekwa oso;  
 je ogbaru madzu ekwo;  
 ke l'o -buru l'e mekocharu;  
 okfu ono nmaa ngu  
 be o-ghakobekwa;  
 mee ngu iphe-iphere.

- 9 Teke nggu ịe madzụ ibe ngu atụ ntụtego;  
 be ewokwaru iphe madzụ  
 kfuru ngu l'edomi kfua.
- 10 Ọdumeka be onye  
 nuru iya nu  
 e-mekwa ngu iphe-iphere;  
 Ọphu ejo epha, ii-vuta  
 ta byadu bya alufu ngu alufu l'ehu.
- 11 Okfu, e kfuru l'ege o gbaru  
 du l'o bu ororo  
 mkpola-ododo,  
 a gakoberu mkpola-ocha.
- 12 Mba, onye maru iphe abaru  
 onye angabeje nchi l'okfu, eekfuru iya  
 dukwa l'o bu iphe-nchi,  
 e gude mkpola-ododo mee;  
 m'o bu iphe odo, e gude  
 okpobe mkpola-ododo mee.
- 13 O bu ege aka-mini eguje eh  
 egugu l'oge okpomoku  
 bu ege nwozi, e gude  
 ire iya eka eguje ndu ezi  
 iya ozi eh egugu.  
 Mbụ l'oomeje; obu egua  
 ndu nwe iya nu egugu.
- 14 Onye asa nsasa iphe-oma,  
 e to medu be dukwa l'o bu  
 igwe, ruru eruru;  
 bya epee pherephere;  
 to chie mini.
- 15 O kwa ota nshi; be e-gude  
 mee onye achi nu;  
 yo mee iphe e to shidu kwe le ya e-me.

- Mbụ l'ọo ire-ọma;  
b'e gude tapyaa ọkpu.
- 16 I -phụa manụ-ẹngu;  
ritakwa iya l'oge-ẹpho ngu;  
I -rinuka iya; be ịi-gbọkwa iya.
- 17 Jetaje ke madzụ l'o-ruberu.  
L'i -gbalaha ya ọshitoshi;  
be ịi-byakwa bya adụ iya ashị.
- 18 O bụ ẹge mgboro;  
m'ọ bụ ogu-mbeke;  
m'ọ bụ akfụ, atsụ nkọ  
ahuje ọku; bụ ẹge nwoke,  
agba madzụ ibe iya ẹjo ekebe aduje.
- 19 Otu-kobe onye ẹ-te medu  
ire-lanụ ishi teke iphe atsụ madzụ l'ẹhu;  
dukwa l'ọ bụ onye eme t'ọ  
taa iphe l'eze; iphe eme iya;  
m'ọ bụ onye eme t'ọ gude  
ọkpa, nwuhuru iya anwuhu jee ije.
- 20 Ogu egvu anụ onye aphụ  
jiru ọkpoma;  
dulekwaphu l'ọ bụ onye  
yefuru uwe iya teke oyi atsụ iya;  
m'ọ bụ onye eteru ose l'ẹke ọnya nọ iya.
- 21 Egu -agụ onye ọhogu ngu;  
nukwa iya nri t'ọ ria.  
Teke mini agụ iya;  
kekwa ya mini t'ọ ngua;
- 22 le teke iime ẹge ono;  
be bụ iphere be iimeta ekpu iya.  
Iphe ono ahua ya ọku l'ẹhu.  
Odo aburu le Ojejoje e-bu ngu-a nggo.
- 23 O bụ ẹge pherephere,

- shì ụzọ ugwu egudeje mini bya;  
 bụ ẹge okfu-azụ akpatajẹ ọdzu ifu.
- 24 Ọ kakwa mma l'i bu l'azụ-ùtsulo;  
 mę lę nggu lę nwanyi  
 okfu-ọnu bu.
- 25 Ọ bụ ẹge mini, guru egugu  
 aduje onye ẹkpiri akpọ nkụ  
 bụ ẹge ozi-oma, shi ẹke, teru ẹnya aduje.
- 26 Onye doberu ẹka ndoo  
 -woru onwiya haaru ẹjọ madzụ;  
 dukwa l'ọ bụ ọgba,  
 a swọru aswọswo;  
 mbụ l'ọ bụ nwogwu,  
 a farushiru afarushi.
- 27 Ẹ tọ dudu mma o rinuka manụ-ẹngu.  
 Ọ kwaphụ ẹge ono;  
 b'ẹ t'ọ dudu mma madzụ  
 o gude ẹka eme t'a kwabe iya ugwu.
- 28 Onye, ẹ-ta adujedu ike ọkpa-de onwiya  
 dukwa l'ọ bụ mkpukpu,  
 e nwukposhiru ụpho-mkpuma iya;  
 yo gheru ọnu.

## 26

- 1 Ọ bụ ẹge aka-mini, daru l'oge  
 ọnanwu ta agadu mkpa;  
 mbụ ẹge mini, chiru teke  
 aakpa nji ta agadu mkpa;  
 bụ ẹge ọkwabe onye eswe  
 ugwu ta gbakwaphu.
- 2 Ọnu, e buru onye ẹ-ta  
 dudu iphe o meru  
 dukwa l'ọ bụ onye aatụ nwenu,

- ephe ephephe iphe:  
 ọ -tụa; yọ tụ-swée ya.
- <sup>3</sup> Èchachi bẹ eegudeje ago ìnya;  
 mkpa bẹ eegudeje ago nkakfụ-ìgara;  
 ndu eswe aburu mgboro;  
 bẹ eechije ephe l'okpurukpu-azụ.
- <sup>4</sup> Be eyekwaru onye eswe onu  
 lẹ mkpọkoro okfu, ookfu.  
 Ọdumeka; bẹ nggu l'iya  
 a-tụkokwa bya aburu ndu eswe.
- <sup>5</sup> Yekwaaru onye eswe onu  
 lẹ mkpọkoro okfu, o kfulu.  
 Ọdumeka; bẹ oo-tubesukwa  
 lẹ ya maru iphe.
- <sup>6</sup> Onye ezi onye eswe ozi  
 dukwa l'ọ bụ onye ebu onwiya achi;  
 l'anụ onwiya nshi.
- <sup>7</sup> Ọ bụ ẹge okpa, akụ onye  
 ngvuru lakpalakpa ta dudu mkpa, ọoga;  
 bụ ẹge etu onye eswe anma ta gadu mkpa.
- <sup>8</sup> Ugwu, a kwaberu onye eswe  
 dukwa l'ọ bụ mkpuma ụrobo,  
 meru mbu-l'eka-uta.
- <sup>9</sup> Eka onye eswe anma etu  
 dukwa l'ọ bụ ẹke onye  
 mee atsụ akpa onwiya ọgvú l'eka.
- <sup>10</sup> Onye butaru onye eswe;  
 m'ọ bụ o-shi-awe-o-shi-awe  
 t'ọ jeeru iya ozi  
 dukwa l'ọ bụ onye agba akfụ  
 gude iya l'emekakota madzụ iphe.
- <sup>11</sup> Ọ bụ ẹge nkuta alajẹ azụ  
 bya eria enwa, ọ nwaru;



- bụ ẹge onye eswe abuje:  
o -mee mkpọkoro iphe;  
yọ la iya azu.
- 12 Mbu; ?I phuru nwa  
ọ-maru-omachata?  
Onye ono bẹ onye eswe kakwa mma.
- 13 Onye ẹnйiru suru l'agu nọ lẹ woroworo;  
l'ejo agu tsoru iphe bụ ọzo adzo-phe.
- 14 O bụ ẹge ibo anọduje  
aswo-phe l'iphe e gude gbaa ya  
bụ ẹge onye ẹnйiru anọduje  
aghaswashị l'oshi-azee ya.
- 15 Onye, ẹnйiru tsuru uwomini  
abuje o -tsuta utara l'ophe;  
yọ kpoo ya agufuta ye l'onu.
- 16 Onye ẹnйiru arije lẹ iya ka  
umadzu esaa, maru oye onu l'okfu  
omaru iphe.
- 17 Onye esweta esweta;  
je eye onu l'okfu, ẹ to madu ishi iya;  
du l'ọ bụ onye jeru je  
aworu nkuta lẹ nchi.
- 18 Onye eduswe ibe iya ọzo;  
su l'ọ bụ okfu bẹ ya ezi iya
- 19 dukwa l'ọ bụ itsoku;  
me ejo akfu, onye ogvu  
gude eme mbereshi.
- 20 Nku -anodu l'oku;  
oku anyihu.  
Ntumatu -laa; uswo alaa.
- 21 O bụ ẹge icheku emeje oku;  
yọ gbanwuhu;  
m'ọ bụ ẹge nku emeje oku; yo nwulihu;

- bụ ẹge onye okfu akpalije okfu.
- 22 Okfu-azụ atsojekwa ntumatu;  
mbụ l'ootukoje ẹhu ọọ kfurukfuru.
- 23 O bụ ẹge ẹremete okfu  
aze-mije ọkpoma nshi;  
bụ ẹge eegudeje nshi  
mkpola-ọcha kpụ-mia ite-ura.
- 24 Onye madzụ dū ashị  
egudeje okfu-ọnu zẹ-chia onwiya.  
Obenu l'ime obu iya;  
bụ ẹregede nọ iya;
- 25 m'o -ruhuduru okfu iya atso ịtsagha.  
Be eyekwaru iya ọnu;  
kẹ l'uruburuku, nọ iya  
l'okpoma rukwaru ẹsaa.
- 26 Ashị, madzụ dū iya;  
bẹ oogudeje ụgho domia.  
Obenu l'iphe dū ẹji, oome;  
bẹ ee-mekocha-a tūa too l'edzudzu ọha.
- 27 Onye egwu iduma;  
bụ iya e-mekochaa dalahụ iya.  
Onye eswi mkpuma;  
bẹ mkpuma ono e-welata  
azụ bya eswipyabẹ.
- 28 Onye ẹjo-ire akpoje ndu,  
oomeka iphe l'ẹhu ashị.  
O kwaphụ ẹge ono;  
bẹ ajaja eli-ọnu emebyije iphe.

## 27

- 1 Ba asakwa nsasa l'owaa iphe ii-me echile;  
kẹ l'ẹ tị madu iphe ụboku  
a-buru.

- <sup>2</sup> Haa t'onye ọdo jaa ngu ajaja;  
 be gudejeshi ọnu ngu;  
 jaa onwongu.  
 Haaru iya onye ọdo;  
 t'ẹ b'ọ bushi nggụbedua l'onwongu.
- <sup>3</sup> Mkpuma anyikwa ẹra;  
 ẹja aburu oke-ivu.  
 Obenu l'onye eswe  
 -kpatsua ngu iwe;  
 b'ọ kakwa iphe labu ono ọnyi ẹra.
- <sup>4</sup> Iphe-eghughu emejekwa  
 iphe-ọnikiri;  
 ọvuma akabaaru ẹji nk'iya.  
 Obenu l'ijimẹnya kakota ẹphe ẹbo ẹji.
- <sup>5</sup> Mba, a baru madzụ jakatangu kakwa mma;  
 mẹ l'i yeru madzụ obu l'edomi.
- <sup>6</sup> Iphe ọnya ngu mekaru ngu kakwa mma;  
 mẹ l'akpa ụgho,  
 onye ọhogu ngu nmaru ngu.
- <sup>7</sup> Ọ bu onye ẹpho jiru;  
 bẹ manụ-ẹngu aduje ẹji.  
 Obenu l'onye ẹgu agu;  
 bẹ iphe atso ile anọdujeru atso iya ẹna.
- <sup>8</sup> Nwoke, bu o-jeta-ọgharu-ufu  
 dukwa l'ọ bu nwenu,  
 phephuhuru l'ekfuna iya.
- <sup>9</sup> Ọ bu ẹge manụ senti yẹle manụ,  
 eshi kwẹkwekwe emeje t'obu atso ẹna;  
 bu ẹge ụzo, onye ọnya ngu kpọ-ziru ngu  
 emeje t'ẹhu kpọ-vohu ngu.
- <sup>10</sup> Ba ahakwa ọnya ngu;  
 ọphu iihakwa ọnya nna ngu;  
 ọphu ị gbakwaru laa kẹ

- nwunne ngu teke ụmuruku mụru ngu;  
 ke l'obutobu, nọ ngu ntse  
 kakwa mma;  
 me le nwunne ngu, nọ ngu ote-nya.
- 11 Maru iphe; nwa mu;  
 nggu emee t'obu tsoje mu ęna;  
 k'ophu mu a-maru iphe  
 mu a-nọdu ekfujeru ndu ta  
 dudu iphe ęphe guberu mu.
- 12 Onye nweru egomunggo  
 abuje o -phua iphe-emeka; yo zee ya.  
 Obenu l'oma-ego adukpuje je ekulahu iya;
- 13 Madzu -su le ya a-noduru  
 o-shi-awe-o-shi-awe l'itumo;  
 natakwa iya uwe iya.  
 Gude yebedua t'o nodu le  
 mkpaleka m'o buru onye  
 mba odo b'o noduru l'itumo obu.
- 14 Madzu lufuta le nchi-abohu;  
 golararu obutobu iya onu;  
 l'ara iya gbagbagba;  
 be oo-dukwa l'o bu iphu b'o phu iya.
- 15 Nwanyi okfu-onu dukwa  
 l'o bu teyiteyi mini mboku mini achi.
- 16 Ahuta iya dukwa l'o bu  
 onwula pherephere azu t'e b'o phehe;  
 m'o bu ogude eka lo-gude  
 manu, awushi awushi.
- 17 O bu ege e gudeje igwe;  
 l'aba igwe t'o tsu nko;  
 bukwaphu madzu agbo-ije madzu ibe iya.
- 18 Onye kuru oshi-figu erijenu akpuru, o mitaru.  
 Ege ono be onye letaru nnajiufu iya ęnya;

- bẹ ọokwabeje ugvu.
- 19 Ọ bụ ẹge madzụ eleje ẹnaya  
     lẹ mini;  
     phụ nwonyonyo iya;  
     bụ ẹge ọkpoma onye  
     ekoshije ẹge onye gbaru.
- 20 Ọ bụ ẹge ẹpho te jijedu ọnwu; too ji alị-maa;  
     bụ ẹge iphe agụebe madzụ;  
     te dzujedu iya edzudzu.
- 21 Mkpọla-ọcha bụ l'ite-igwe  
     b'e egheje iya; gude data iya.  
     Mkpọla-ododo aburu  
     l'ọku-uzu b'e egheje iya; gude data iya.  
     Obenu lẹ madzụ bụ ajaja,  
     aaja iya b'e gudeje maru ẹge ọ gbaru.
- 22 Ẹ to nwekwa m'ì tsuru onye eswe l'ọtumu;  
     mbụ; m'ì gude ọdzú tsua ya otsu ose;  
     ii-gbe tsufu iya ririri l'ẹhu.
- 23 Majẹkwaru ẹge aturu ngu eje iya.  
     Nggụ akwabejekwaru eswi ngu ẹnaya.
- 24 Kẹ l'iphe-enweru ta  
     aanojekwa jeyewaru;  
     ọphu onye lanụ 'ekpujekwa  
     okpu-eze tsube l'ogbo sweru ogbo.
- 25 E -gbufu ẹwu; kẹ ọphungu eruchita.  
     E -je l'eli ugvu; e gbua ẹwu ọphungu.
- 26 Ụnwu aturu ngu bụ iya  
     e-webe ngu iphe.  
     Eghu bụ iya bẹ ii-nọdu ere gude azụ alị.
- 27 Ii-nweru ẹra-eghu, ii-gude  
     azụ nggu lẹ ndibe ngu;  
     mẹ ụnwegirima ụnwanyi,  
     ì gude egude.

## 28

- <sup>1</sup> Ejo madzụ anọduje agba ọso;  
l'ẹ bọ dụ onye achị iya nụ.  
Obenu l'onye doberu ẹka ndoo;  
bẹ obu esihuje ike l'ọ bụ agụ.
- <sup>2</sup> Mba -watawa okwefu ikè;  
ẹphe awata ọgba-nweshi  
ndu ishi ẹphe ẹka ẹka.  
Obenu l'onye, maru iphe;  
nweru egomunggo bụru ishi;  
obu egvuru ndu ọochi egvuru.
- <sup>3</sup> Onye ishi, akpa ndu ụkpa ẹhu;  
dụkwa l'ọ bụ mini, chikoru  
iphe e meberu l'alị kpota.
- <sup>4</sup> Ndu jikaru ome iphe a turu  
l'ekemu;  
kwa ndu ẹjo iya ono;  
bẹ ẹphe l'ẹphe bụ ike.  
Obenu ẹ ndu eme iphe  
a turu l'ekemu bụ ndu eme  
iphe dụ ẹji bẹ ẹphe enwufu.
- <sup>5</sup> Ndu eme iphe dụ ẹji iphe  
vudo nhamunha te edojedu ẹnya.  
Ọ bụ ndu maru Ojejoje;  
b'o dokotaru ẹnya ọhuma.
- <sup>6</sup> Onye ụkpa, eme ire-lanụ; kakwa mma  
mẹ l'onye nweru iphe;  
l'arụ ụrukutu.
- <sup>7</sup> Nwa, emeje iphe a turu  
l'ekemu bụkwa onye,  
maru iphe.  
Obenu l'onye yẹle ndu ẹkpiri ayị;  
bụ iphe-iphere b'o me ekpu nna iya.

- 8 Onye gude ọ-muru-nwa l'akpa ẹku  
kwa onye aphuru ndu ukpa imiko;  
be ookpa ẹku obu edoberu.
- 9 Onye jikaru le ya te medu ekemu  
be ekfukfu, ookfu anu  
Nchileke abujeru Nchileke akpamara.
- 10 Onye du onye, obu guru  
iphoro; shilaha ejo uto;  
kwa onye obu a-nma l'onya, o gbaru.  
Obenu l'onye e-te emedu  
iphe aata iya uta; e-keta okè l'iphe-oma.
- 11 Onye nweru iphe; etubesuje le ya maru iphe.  
Obenu l'onye ukpa,  
egomunggo ruru ali a-vofuta iya-a.
- 12 Onye doberu aka ndoo  
-bahụ l'ochichi;  
ehu atsolahaa ndiphe.  
Ejo madzu -bahukwanu iya;  
ndiphe acholahaa eke ephe e-domi  
onwephe.
- 13 Onye akpami ejo iphe,  
o meru akpami;  
b'e t'o dujekwaru le mma.  
Obenu l'onye koshiru iphe  
o meru; haa ya ememe;  
be aaphujeru imiko.
- 14 Onu-oma bu k'onye atsu Ojejoje egvu.  
Obenu l'onye kpo-chiru  
okpoma e-je iphe-ehuka.
- 15 O bu ege agu, ede ekiri;  
m'o bu biye, abo erumu du;  
bu ege onye gude akirishi achi ndu ukpa du.
- 16 Onye ishi, gude ike achi;

- bẹ te nwedu egomunggo.  
 Obenu l'onye ẹku, eegude  
 ụgho akpa dụ ashị bẹ a-ka nka.
- 17 Onye gburu ọchi;  
 ọchi ono gude iya;  
 bẹ a-nọdu aghalephu  
 kpata phungu jeye teke ọo-nwuhu.  
 T'ẹ b'ọ dụkwa onye a-gbaru iya mkpu.
- 18 Onye eme iphe, uta ta dudururu iya;  
 ta dụkwa iphe eme iya nụ.  
 Obenu l'onye arụ ụrukutu;  
 a-kpọ-buhukwa; daa.
- 19 Onye eseshi akanya ike;  
 e-nwe nri; nwee ya k'etsutsu.  
 Obenu l'onye adabujeru  
 l'omephe iphe ẹ-ta agadu mkpa;  
 bẹ a-buru ụkpa-mkpere.
- 20 Ọnu-oma, tso onye ire-lanụ ahajẹ nshinu.  
 Obenu l'onye achị ẹku l'ike;  
 te erighakwaru iya.
- 21 Ọbo madzụ ẹbo ta dụkwa mma.  
 Obenu lẹ madzụ  
 emeswejelekwa l'okfu nri.
- 22 Onye ụkparaswi bụ iya;  
 bẹ onweru iphe ka agugu;  
 ọphu ọomadu l'ọkpa ụkpa eche iya echeche.
- 23 Onye, baru onye  
 mesweru nụ  
 m̀bà; bẹ onye ono, a baru  
 m̀bà ono e-mekochaa maru  
 l'ọ ka iya ome ọhuma;  
 mẹ l'onye ọphu bulephu  
 ajaja eli-ọnu b'ọ jajẹ iya.



- 24 Onye ezitaje iphe nna iya;  
 m'ò bụ kẹ nne iya; sụ:  
 “L'ẹ tọ bụdu ome ẹji”  
 bẹ yẹle onye mmebyi bụkwa iphe lanụ.
- 25 Onye nchamẹnya akpalije okfu.  
 Obenu l'onye dakoberu  
 Ojejoje; bẹ ọo-duru lẹ mma.
- 26 Onye chiru ụkfu kwẹe  
 onwiya bụ onye eswe b'ọ bụ.  
 Obenu l'onye gude  
 mmamiphe eme iphe ta  
 dudu iphe eme iya nụ.
- 27 Onye anuje onye ụkpa iphe;  
 bẹ ụko taa kọdu.  
 Obenu l'onye aphuje ndu ụkpa  
 woru ẹnya lopyia;  
 bẹ aa-dụ l'igwe kọo ọnu.
- 28 Ẹjo madzụ baa l'ọchichi;  
 ndiphe edomishilaha onwẹphe.  
 Obekwanu lẹ ndu ẹjo iya  
 ono -kpolashihu;  
 ndu doberu ẹka ndoo aka l'igwe.

## 29

- 1 Onye aabaru mbà tekenteke;  
 yo mele-e iphe oome;  
 bẹ ọtu-gbirimu a-tụ;  
 ọphu a byadụ aghata iya aghata
- 2 Ndu doberu ẹka ndoo -bata l'ọchichi;  
 ndiphe etelaha ẹswa.  
 Onye ẹjo iya ono -bata l'ọchichi;  
 ndiphe atsulaha ude.
- 3 Onye yeru mmamiphe obu

- emeje t'ehu atso nna iya ena.  
 Obenu l'onye eme  
     k'unwanyi okpara;  
 be erigbuje iphe iya.
- 4 O bu ikpe, du maa;  
     be eze egudeje mee mkpukpu, o chi;  
 yo keru ekeru.  
 Obenu l'onye enya  
     ori wuruwuru no egudeje  
     eka-azu kpakashia ya.
- 5 Onye aja madzu ibe iya ajaja eli-onu  
     bu ugbu, e-kota iya l'okpa; be ooge.
- 6 Ejo madzu; be ojo iphe oome  
     anmaję l'o bu onya.  
 Obenu l'onye doberu eka ndoo  
     anoduje agu egvu; ehụ l'atso iya.
- 7 Onye doberu eka ndoo ezije  
     obu l'ali;  
     l'ekpe ndu ukpa ikpe nhamunha.  
 Obenu l'ejo madzu ta budu iphe oome;  
     b'o kpa ishi iya.
- 8 O kwa ndu, bu  
     o-gude-onu-akpa-nko bu  
 ndu emeje te okfu l'ada le mkpukpu.  
 Obenu le ndu, maru iphe;  
     abyanyije iphe-eghughu.
- 9 Onye nweru egomunggo  
     -kpuru onye eswe je ulo-ikpe;  
 be iphe onye eswe obu  
 awataje ememe bu:  
     ochi-phe mkpokoro ochi;  
     me oba-phe korokoro;  
     ophu 'oo-kwedu te nchi du ndoo.

- 10 Ndu mgbugbu-madzu;  
 be onye eme iphe vudo  
 nhamunha adujekwa eji.  
 Ephe awata ocho ege epe e-shi wofu iya.
- 11 Onye eswe avu-geje ovuma l'ege o ghu iya.  
 Obenu l'onye maru iphe  
 akpadeje onwiya.
- 12 O -buru l'onye achichi  
 angaje nchi l'iphe bu ejo-ire;  
 be iphe bu ndu ejeru iya  
 ozi abukotalephu ndu ejo iya.
- 13 Onye ukpa; me onye akpa  
 madzu ehu nweru iphe, epe gba mgba.  
 Ipe obu bu l'o bu Ojejeje  
 asaje epe enya.
- 14 Onye eze -gude ire-lanu  
 l'ekpe ndu ukpa ikpe;  
 be aba-eze iya a-nguru  
 anguru gbururu jeye.
- 15 O bu echachi b'e gudeje  
 hua nwata;  
 yo maru iphe.  
 Obenu le nwata, a haru ehu;  
 emechije nne iya ifu.
- 16 Ndu ejo iya ono aka nshinu eje;  
 ejo iphe l'akakwaphu nshinu eje.  
 Obenu le ndu ophu doberu  
 eka ndoo e-gude enya  
 phu teke epe a-nodu ada.
- 17 Hua nwa ngu ahuhu;  
 ege nchi adu ngu ndo;  
 me k'ophu oo-me t'obu tso ngu ena.
- 18 Eke e te nwedu onye aphu;

- bẹ onyenonu emeje ẹge dụ iya mma.  
 Obenu l'onu-oma bu  
 k'onye eme iphe a turu l'ekemu.
- 19 Ẹ tọ bụlekwa-a okfu-onu;  
 b'e gude ezi ohu iphe nwenkinyi;  
 ke l'iphe i kfulu iya e-do iya-a enya;  
 obenu l'ẹ too yeduru ngu onu.
- 20 ?I phuru onye awo okfu kpokongu?  
 Onye ono bẹ onye eswe  
 a-kakwa oburu madzu.
- 21 Nwoke -shi le nwata  
 l'aswaru nwozi iya aswaru;  
 bẹ nwata obu e-mekochaa naa ya ufu iya.
- 22 Onye ovuma akpalije okfu;  
 onye okpoma-oku l'eme  
 te ẹjo iphe ka l'igwe.
- 23 Madzu -watawa oku  
 onwonye ekuku;  
 a maru l'adada iya ruwaru.  
 Obenu l'onye eme agu;  
 bẹ ugvu etsoje.
- 24 Onye gbaru l'ogbo iphura;  
 bẹ kwa onwiya dụ iya ashị;  
 ke l'aanuje onye obu nte;  
 te b'ọ dụ teke oo-gba ama.
- 25 Onye atsụ madzu egvu;  
 kwa onya b'ọ gbaru onwiya.  
 Obenu l'onye, bu Ojejoje  
 b'ọ chiru ukfu kwee  
 te nwekwa iphe eme iya nu.
- 26 Aajuje igweligwe aho  
 t'onye ishi meeru ephe  
 iphe-oma.

Obenu l'ọ bụ Ojejoje bụ  
onye ekpeje ikpe, dị mma.

- 27 Onye ẹ te emedu iphe vudo nhamunha;  
aduje onye doberu ẹka ndoo ashị.  
Ege ono bẹ onye obu gụru iphoro  
aduje ejo madzu.

### 30

- 1 Ọwaa bụ ọnu-okfu Aguru Jake kẹ Masa.  
Nwoke ono kfuru iya Itiyelu.  
O kfuru iya Itiyelu; kfuaru iya Ukalu; sụ:
- 2 “Ọ bụ iya katsukpo ọbuta idigagalogo  
l'iphe bụ madzu;  
lẹ ya te nwekpodua  
egomunggo madzu lẹ phuu.
- 3 Lẹ ya ta mụdu mmamiphe;  
ya ta ma onye nsọ ono amama ophu.
- 4 ?Bụ onye nyibajewaru imigwe; nyizita?  
?Bụ onye gbajewaru  
okoroko; kuta pherephere?  
?Bụ onye gudejewa uwe  
iya kechia mini, nọ iya nụ?  
?Bụ onye meru tẹ mgboko  
jebetsua ẹke o jebeberu?  
?Epha onye ono bụ ngunu?  
?Bụ ngunu bụ epha nwa iya?  
Kanuru mu iya m'i maru iya.
- 5 Okfu Nchileke l'ọ ha ta adakwa ẹda.  
Oobuje mgbaru-ike iphe bụ  
ndu gbabaru l'ime iya;  
k'ophu ndzu e-dzu epha.
- 6 Be eyekwakwa iphe l'okfu iya;  
odumeka bẹ ọo-bakwaru ngu mba;

- gụbe ngu onye ejo-ire.  
 7 Iphe labụ bẹ mu arọ ngu;  
 nggụbe Ojejoje;  
 ba ajikakwa mu omeru iphe  
 tẹmanu mu anwuhude.
- 8 Mee tẹ mu be ejejeshi  
 oye ẹka l'iphe-mmanu.  
 Be emekwa tẹ mu kpaa ụkpa;  
 ọphu i mekwa tẹ nweru iphe.  
 Nụjele mu phụ ọphu  
 e-dzuru mu nụ.
- 9 Ọdumeka; bẹ mu  
 e-nwenukakaruru iphe;  
 shi ẹge ono jịka ngu;  
 kfulahaa; sụ:  
 'Bụ onye bụ Ojejoje ọbu';  
 m'ọ bụ mu akpalahaa ụkpa; yo zia mu oshi;  
 shi ẹge ono mebyia ẹpha  
 nggụbe Nchileke mu.
- 10 Ba atujekawaru nwozi  
 yẹle nnajiufu iya mgba;  
 Ọdumeka bẹ oo-bukwaru  
 ngu ọnu, e-re nụ.
- 11 O nwekwaru ndu anọdije akọ nna ẹphe ọnu;  
 ọphu ẹphe emedu nne ẹphe ọhuma.
- 12 Mbụ ndu arije l'ẹphe dụ-geru;  
 ọbu l'ejo adudu, ẹphe dụ  
 ta alufukwa ẹphe l'ẹhu.
- 13 Mbụ ndu anọduje eku  
 onwẹphe ekuku;  
 l'ele kọrobangu.
- 14 Eze, nọ ẹphe l'ọnu  
 bụ ogu-mbeke; mẹ nkogo,

ẹphe gude t'ẹphe tuko  
 ndu ukpa, nọ ẹ mgboko  
 gbushikota;  
 mbu mee te ndu ẹ to  
 dudu ẹge oharu ẹphe  
 chihu ẹ mgboko.

15 Etu-mini mutaru  
 unwu-mgboko labu;  
 Iphe ẹphe anọduje  
 araru iya aburu:

'Nu mu! Nu mu!'  
 O nweru uzi iphe ẹto,  
 ẹpho te ejijedu ejiji;  
 mbu uzi iphe ẹno,  
 ẹ-ta sụbua: 'L'o dzuwaru!'

16 Iphe ono bu: ili; ẹkpa-nwa nwanyi,  
 ẹ-ta atsudu ime; yele ali;  
 ke l'ali t'angunyabudua min  
 i su ẹ ya ta anguhedu.  
 Owaa oku, enwu enwunwu.  
 Oku te nwedu l'oo-nonyaa;  
 su: 'L'o dzuwaru!'

17 Onye egvu nna iya ẹnya;  
 t'oo ngaru nne iya nchi l'iphe o ziru iya;  
 be egbe-nwoku e-shi ẹ  
 nsuda ugvu bya aswota iya ẹnya.  
 Yo buru udele e-ri iya.

18 O nweru uzi iphe ẹto,  
 du mu biribiri nshinu;  
 mbu uzi iphe ẹno, ẹ-te edodu mu ẹnya:

19 Uzo ugo l'akpamigwe;  
 uzo agwo l'eli mkpuma;  
 me uzo ugbo-mini l'eze ẹnyimu;

- yele ụzo nwoke yele nwanyi.  
 20 Owaa ẹge nwanyi ọkpara emeje:  
 Ooriye; fuchaa ọnu.  
 O me; yọ sụ:  
 'Lẹ tọ dukwa iphe dụ ẹji ya meru.'
- 21 O nweru uzi iphe ẹto,  
 mgboko anmajẹ jijiji;  
 mbụ uzi iphe ẹno kpọru mgboko ẹka:
- 22 Iphe ono bụ:  
 ohu, ghọru onye eze;  
 onye eswe, dafutaru nụ bya enweru iphe;
- 23 nwanyi, dụ madzụ ashi,  
 mekocharu; lụa nji;  
 ọdo bụ nwamgboko,  
 e gude egude; yọ kpafu  
 nnufu, gude iya nụ.
- 24 O nweru iphe ẹno haje,  
 nwanshii lẹ mgboko;  
 Obenu l'ẹphe manwuru iphe ẹhu:
- 25 Ndada bụ iphe agburu-ẹhu  
 ta nọdu, e meru dobe lẹ mgboko.  
 Obenu l'ọ pakọje nri  
 l'ọnanwu dobe, o e-ri l'udzu-mini.
- 26 Ewalị bụ unwu anụ,  
 ụvo ẹ-ta nọdu, e meru dobe lẹ mgboko.  
 Obenu l'ọ kpakahujele eze mkpuma buru.
- 27 Igube te nwedu ézè;  
 ọbule ọnodujele ephe l'ọgbo l'ọgbo.
- 28 Ngwere; bẹ ee-gude ẹka anwuta.  
 Obenu l'ọo-nọjele-e l'ufu-eze.
- 29 O nweru uzi iphe ẹto,  
 ahaje ọkpa ije ọhuma;  
 Mbụ uzi iphe ẹno,



- ahaje ọkpa ije k'ugvu ugvu.
- 30 Iphe ono bu agu.  
 Agu bu iya bu anu,  
 kakota ike l'iphe bu anu.  
 E to dudu iphe o gbaru oso;
- 31 Odo bu oke-oku, adzo  
 kfun gangangu kfun gangangu;  
 me mkpi;  
 yele onye eze, ndu soja iya  
 do-pheru mgburumburu.
- 32 O -buru l'i shi mewaa  
 l'o bu onye eswe;  
 shi atu-lije onwongu atu-li;  
 m'o bu l'o nweru idzu iphe du eji, i chiwaru;  
 kpuchikwaa aka l'ifu l'iphere iya!
- 33 Ke l'o bu ege ono, bu:  
 e -gude mini era-eswi;  
 e meta iya manu-buredu,  
 eeku Bota, abuje;  
 a -swikpoo imi aswikpo;  
 yo wufuta mee;  
 bu ege bukwaphu;  
 a -kpalia iphe-eghughu; okfu ada.”

## 31

### *Onu-okfu eze, bu Limelu*

- 1 Owaa bu okfu mmamiphe  
 eze, bu Limelu.  
 Okfu owaa bu okfu  
 mmamiphe, nne iya ziru iya:
- 2 “Byiko nwa mu.  
 Nggube nwa ophu,  
 shi mu l'epho;

- nwa, mu kwetaru l'ukwa iphe.
- <sup>3</sup> Be ezikwa ike ngu  
l'ome ke nwanyi!  
Be ewokwaru onwongu  
haaru ndu ono,  
emebyije ndu eze ono.
- <sup>4</sup> Byiko Limelu; e to bukwa ke ndu eze.  
Ongu mee ta gbakwa ndu eze.  
E to gbakwa te mee,  
eme l'enya guje ndu ishi.
- <sup>5</sup> E -menyaa; ephe ngua mee;  
zahaa iphe ekemu kfururu;  
nafu ndu eemegbu  
emegbu ikpe, du maa, gbaru ephe.
- <sup>6</sup> Nu ndu ala l'iyi mee, eme l'enya;  
nggu anu ndu aphu byaru mee;
- <sup>7</sup> t'ephe ngua; zahaa ege o duru ephe.  
Mbu; t'ephe ba anyatahe  
iphe-ehuka, byaru ephe.
- <sup>8</sup> Dzoje odzo ehuru ndu ono,  
e-ta dujedu ike odzo odzo  
ehuru ephe ono  
Dzojeeru unwu-ogbe iphe gbaru ephe.
- <sup>9</sup> Kfuje iphe gbaru ngu l'ekfukfu;  
nggu ekpeje ikpe nhamunha.  
Gbajeru ndu ukpa yele ndu  
e to nwedu ege o ha ephe odzori."

*Nwanyi umere oma*

- <sup>10</sup> Nwanyi, bu okpobe nwanyi;  
?bu onye a-cho-vughe iya?  
Egbe nwanyi ono kakwa  
mkpuma, vu oke aswa ire.

- 11 Nji iya egudeje ire iya ẹka;  
 ọphu ọ dudu ọkpobe  
 iphe akọ iya ọko.
- 12 Iphe-oma be  
 oo-walatajeru nji iya.  
 E too wolatadu iphe-emeka;  
 jeye l'oge nka-ezekuna nk'iya.
- 13 Ofoje ẹji aturu yele owu;  
 fota ndu ọphu du mma;  
 gude ekwe ẹkwa; yo he iya uhere.
- 14 Egbe nwanyi ono du  
 l'ọ bu ọgbo-mini ndu agba ikike ngho;  
 ke l'oojeje ẹke teru ẹnya  
 je akpata nri.
- 15 Ootehuje le gerigeri nchi-aboju;  
 mee nri; doberu ndibe iya;  
 bya ekeeru unwu-mgboko,  
 ẹphe l'iya bu ọru.
- 16 Ooleje ẹnya ọkpobe ali; zua;  
 bya egude okpoga,  
 o jetaje kọo mgbo vayinu.
- 17 O -noje ozi iya ke kerere le phururu;  
 Eka eshihujẹ iya ike l'ozị.
- 18 Ngho, ọogba;  
 be ọogbaje iya rita iya uru;  
 Ophu iphe-ọku iya  
 anyihudu ẹnyashi mgburumgburu.
- 19 Oo gudeje ẹka iya gbaa òwúú;  
 gude ẹka iya kwee ẹkwa l'onwiya.
- 20 O saje ẹka l'emere ndu  
 ukpa me ndu e to dudu  
 ẹge o ha ẹphe iphe-oma;
- 21 Teke oyi atsushi ike;

- b'ẹ tọ kpajẹdu ishi;  
 kele ndibe iya b'ọ  
 dzushiwaru uwe oyi.
- 22 Oogudeje ẹka iya  
 kwee ẹkwa, ọotoje l'iphe-azẹe ya.  
 Uwe iya bu ọkpobe ẹkwa  
 ọcha yele k'uswuswe.
- 23 Nji iya be aakwabeje ugvu  
 k'iche l'obu-edukfu l'ẹke  
 ndu bu ọgurennya mkpukpu dzuru.
- 24 Oogudeje ẹka iya kwee uwe ọcha;  
 dobe l'ere.  
 Ọ bu iya be ndu agba ngho  
 azutaje iphe oke-l'ukfu.
- 25 Okpehu yele ọdu ugvu;  
 be tsoru iya ẹhu;  
 Oo-mekochaa mumua  
 onu-ochi l'uzo ifu.
- 26 Oogudeje mmamiphe ekfu okfu;  
 ẹge ono b'ọ buje;  
 ọ -kpọ-ziru madzu ọzo;  
 yọ buleruphu ọkpobe  
 iphe b'o zije onye ọbu.
- 27 Ndibe iya be ooswijeru  
 eswiru; eleta ẹphe ẹnya;  
 Ophu ẹnyiru anodu iya.
- 28 Unwu iya awu-lihuje;  
 kua ya onye a goru onu-oma.  
 Nji iya l'ekukwa iya phu  
 ẹge ono; l'aja iya ajaja.
- 29 "Le mgboko owaa;  
 gbaa mgburumburu;  
 be unwanyi, eme iphe,

dụ mma; dụ ugvu jikwaru ejiji.

Ọ bụ l'ọo nggụbedua kakọta iya ẹphe!”

30 Ọdu ugvu l'ẹnya  
eduswejekwa madzụ;  
oma-mma aburu  
iphe ẹ-ta kpọjedu ụkfu.  
Obenu ẹ nwanyi,  
atsụ Ojejoje egvu;  
be gbaru t'a jaa ya ajaja.

31 Bua ya obunggo, gbaru iya nụ;  
Mbụ t'ozị, o gude ẹka iya eje mekwaa  
t'e tua ya ẹpha l'obu-edukfu.

**Bayiburu Ikwo**  
**Ikwo: Bayiburu Ikwo Bible**

copyright © 2014 Wycliffe Bible Translators, Inc.

Language: (Ikwo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

3867ef4e-3384-5ab4-a937-63476bb8a7bb